


唐詩所前集

廿五之六

廿七



漢書門			
類	號	函	架
一	一	八	三
二	四	四	二
三	二	三	一

內閣文庫			
類	號	冊	函
漢	一	一	三
書	八	三	二
	四	二	六

內閣文庫			
番號	漢	11843	
冊數	32 (17)		
函號	319	124	



唐詩所第二十五卷

古詩

前集

雜體

古意

吳少微

洛陽芳樹向春開洛陽女兒平旦來流車走馬紛相催

折芳瑤華向曲臺曲臺自有千萬行重花累葉間一作映

垂楊北林朝日鏡一作錦明光南國微風蘇合香可憐窈

窕女不作邯鄲娼妙舞輕迴拂長袖高歌浩唱發清商

歌終舞罷歡無極樂往悲來長歎息陽春白日不少留

紅榮碧樹無顏色碧樹風花先春度珠簾粉澤無人顧

如何年少忽遲暮坐見明月與白露明月白露夜已寒

香衣錦帶空珊珊今日陽春一妙曲鳳皇樓上與君彈

古意

李頎

別兒事長征少小幽燕客賭勝馬蹄下由來輕七尺殺
人莫敢前鬚如蝟毛礫黃雲隴底白雪飛未得報恩不
能得一作歸遼東小婦年十五慣彈琵琶解歌舞今為羌
笛出塞聲使我三軍淚如雨

雜興

沈沈牛渚磯舊說多靈怪行人夜秉生犀燭洞裏洪深
闕滂湃乘車駕馬往復旋赤紱朱冠何偉然波驚海若
潛幽石龍抱胡髯卧黑泉水濱丈人曾有語物或惡之

當害汝武昌妖夢果為災百代英威埋鬼府青青蘭艾
本殊香察見泉魚固不祥濟水自清河自濁周公大聖
接輿狂千年魑魅逢華表九日茱萸作佩囊善惡死生
齊一作一貫祗應斗酒任蒼蒼

感遇

岑參

北山有芳杜靡靡花正發未及得采之秋風忽吹殺君
不見拂雲百丈青松柯縱使秋風無奈何四時常作青
黛色可憐杜花不相識

擬八詠

二首應制

上官儀

啓重帷重帷照文杏翡翠藻輕花流蘇媚浮影瑤笙燕

詩雜體

卷二十五

二

始歸金堂露初晞風隨少女至虹共美人歸羅薦已
鴛鴦被綺衣復有蒲萄帶殘紅豔粉映簾中戲蝶流鶯
聚窗外洛濱春雪迴巫峽暮雲來雪花飄玉輦雲光上
璧臺共待新粧出清歌送落梅

入叢臺叢臺裊春露滴瀝間深紅參差散輕素粉蝶驚
復聚黃鸝飛且顧攀折殊未已復值驚飛起送影舞衫
前飄香歌扇裏望望惜春暉行行猶未歸暫得佳遊趣
更愁花鳥稀且鳥聲調鳳管方移花影入鴛機

送李睢陽

王維

將置酒思悲翁使君去出城東麥漸漸雉子斑槐陰陰

到潼關騎連連車遲遲

心中悲宋又遠周間之

南淮夷東齊兒碎碎織練與素絲遊人賈客信難持五
穀前熟方可爲下車閉閣君當思天子當殿儼衣裳太
官尚食陳羽觴彤庭散綬垂鳴璫黃紙詔書出東廂輕
紈疊綺爛生光宗室子弟君最賢分憂當爲百辟先布
衣一言相爲死何況聖主恩如天鸞聲噦噦魯侯旂明
年上計朝京師須憶今日斗酒別慎勿富貴忘我爲

西亭子送李司馬

岑參

高高亭子郡城西直上千尺與雲齊盤崖綠壁試攀躋
羣山向下飛鳥低使君五馬天半嘶絲繩玉壺爲君提

坐來一望無端倪紅花綠柳鶯亂啼千家萬井連迴紵
酒行未醉聞暮雞點筆操紙爲君題爲君題惜解攜草
萋萋沒馬蹄

送郝判官

李頎

楚城木葉落夏口青山遍一作轉鴻鴈向南時君乘使者
傳楓林帶水驛夜火明山縣千里送行人蔡州如眼見
江連清漢東逶迤遙望荆雲相蔽虧應問襄陽舊風俗
爲余騎馬習家池

鸚鵡洲送王九之江左

孟浩然

昔登江上黃鶴樓遙愛江中鸚鵡洲洲勢逶迤還一作統

碧流鴛鴦灘鵜浦灘一作沙頭灘一作沙頭日落沙磧長金

沙熠熠一作耀動颺光舟人牽錦纜浣女結羅裳月明全

見蘆花白風起遙聞杜若香君行采采莫相忘

送張獻心克副使歸河西

岑參

將門子弟君獨賢一從受命常在邊末年三十已高位
腰間金印色赭然前日承恩白虎殿歸來見者誰不羨
篋中賜衣十重餘案上軍書十二卷看君謀智若有神
愛君詞句皆清新澄湖萬頃深見底清水一片光粲人
雲中昨夜使星動西門驛樓出相送玉瓶素蟻臘酒香
金鞭白馬紫遊韁花門南燕支北張掖城頭磧雲一作雲正

黑送君一去天外憶

單父東樓秋夜送族弟沈之秦 李白

爾從咸陽來問我何勞苦沐猴而冠不足言身騎土牛
滯東魯沈弟欲行疑弟留孤飛一鴈秦雲秋坐來黃葉
落四五北斗已一作稍挂城西樓絲桐感人絃亦絕蒲堂
送君皆惜別卷簾見月清興來疑是山陰夜中雪明日
斗酒別惆悵清路塵遙望長安日不見長安人長安宮
闕九天上此地曾經為近臣一朝復一朝髮白心不改
屈原憔悴滯江潭亭伯流離放遼海折翩翩飛隨轉蓬
聞弦虛墜下霜空一作翼短天長夫不窮聖朝久棄青雲士他日

誰憐張長公

魯郡堯祠送竇明府薄華還西京

朝策犁眉騮舉鞭力不堪強扶愁疾向何處角巾微服
一作堯祠南長楊掃地不見日石門噴作金沙潭笑誇
故人一作伯明指絕境山光水色青於藍廟中徃徃來擊鼓
堯本無心爾何苦門前長跪雙石人有女如花日歌舞
銀鞍繡轂徃復迴簸林蹶石鳴風雷遠煙空翠時明滅
白鷗歷亂長飛雪紅泥亭子赤闌干碧流環轉青錦湍
深沉百丈洞海底那知不有蛟龍蟠君不見綠珠潭水
流東海綠珠紅粉沈一作白首同歸翳光彩綠珠樓下花浦園

今日曾無一枝在昨夜秋聲聞闔來洞庭木落騷人哀
遂將三五少年輩登高遠望送一作遠形神開生前一笑輕
九鼎魏武何悲銅雀臺我歌白雲倚惚牖爾聞其聲但
揮手長風吹月度海來遙勸仙人一杯酒酒中樂酣宵
向分舉觴酌堯堯可聞何不令臯陶擁篲橫八極直上
青天揮一作掃浮雲高陽小飲真瓊瑣山公醅酌何如我
竹林七子去道賒蘭亭雄筆安足跨堯祠笑殺五一作鏡
湖水至今憔悴空荷花爾向西秦我東越暫向瀛洲訪
金闕藍田太白若可期為余掃灑石上月

送田少府貶蒼梧

高適

沈吟對遷客惆悵西南天昔為一官未得意今向萬里
令人憐念茲斗酒成睽間停舟歎君日將晏遠樹應憐
北地春行人却羨南歸鴈丈夫窮達未可知看君不合
長數竒江山到處堪乘興楊柳青青那足悲


送魏四落第還鄉

岑參

東歸不稱意客舍戴勝鳴臘酒飲未盡春衫縫已成長
安柳枝春欲來洛陽梨花在前開魏侯池館今尚在猶
有太師歌舞臺君家盛德豈徒然時人注意在吾賢莫
令別後無佳句祇向壚頭空醉眠

送劉方平

李頎



綺紈遊上國多作少年行二十二詞賦惟君著美名童
顏且白晢佩德如瑤瓊荀氏風流盛胡家公子清有才
不偶一作誰之過肯卽藏鋒事高卧洛陽草色猶自春
遊子東歸喜拜親漳水橋頭值鳴鴈朝歌縣北少行人
別離斗酒心相許落日青郊半微雨請君騎馬望西陵
爲我殷勤弔魏武

送劉昱

八月寒葦花秋江浪頭白北風吹五兩誰是潯陽客鷓
鴒山頭微雨晴揚州郭裏暮潮生行人夜宿金陵渚試
聽沙邊有鴈聲

送郭乂

岑參

地上青草出經冬今始歸博陵無近信猶未換春衣憐
汝不忍別送汝上酒樓初行莫早發且宿灞橋頭功名
須及早歲月莫虛擲早年已工詩近日兼注易何時過
東洛早晚度盟津朝歌城邊柳韞地邯鄲道上花撲人
去年四月初我正在河朔會上君家縣北樓樓上分明
見恒嶽中山明府待君來須計行程及早回到家速覓
長安使待汝書封我自開

送舍弟

李白

吾家白額駒遠別臨東道他日相思一夢君應得池塘

生春草

送郭處士往萊蕪兼寄荀山人

高適

君為東家客往來東家畔雲卧臨嶧陽山行窮日觀少年詞賦皆可聽秀眉白面風清冷身上未曾染名利口中猶未知膾脍今日還山意無極豈辭世路多相識歸見萊蕪九十翁為論別後長相憶

送宇文南金放後歸太原居因呈太原郝主簿

岑參

歸去不得意北京關路賒却投晉山老愁見汾陽花翻作灞陵客憐君丞相家夜眠旅舍雨曉辭春城鴉送君

繫馬青門口胡姬壚頭勸君酒為問太原賢主人春來更有新詩否

送魏升卿擢第歸東都因懷魏校書陸渾喬潭

高適

井上桐葉雨

一作赤

灞亭卷秋風故人適戰勝匹

一作走馬

歸山東問君今年三十幾能使香名滿人耳君不見三峰直上五千仞見君文章亦如此如君兄弟天下稀雄辭健筆皆若飛將軍金印鞶紫綬御史鐵冠重繡衣喬生作尉別來久因君為問平安否魏侯校理復何如前日人來不得書陸渾山水佳可賞蓬閣閒時日應往自

料青雲未有期誰知白髮偏能長
墟頭青絲白玉瓶別時相顧酒如傾
搖鞭舉袂忽不見千樹萬樹空蟬鳴

送別

李白

尋陽五谿水沿洄直入巫山裏
勝境由來人共傳君到南中自稱美
送君別有八月秋颯颯蘆花復益愁
雲帆望遠不相見日暮長江空自流

別韋參軍

高適

二十解書劍西遊長安城舉頭望君門
屈指取公卿國風冲融邁三五朝庭歡
禮一作樂彌寰宇白璧皆言賜近臣
布衣不得干明主歸來洛陽無負郭
東過梁宋非吾

士兔苑爲農歲不登鴈池垂釣心長苦
世人向一作遇我

同衆人唯君於我最一作情相親且喜百年有一作見交態

未嘗一日辭家貧彈棊擊筑白日晚縱酒高歌揚柳春

歡娛未盡分散去使我惆悵驚心神丈夫一作終當不作兒

女別臨岐涕淚一作沾衣巾

留別于十一兄逃裴十三遊塞垣 李白

太公渭川水李斯上蔡門釣周獵秦安黎元小魚鮓兔
何足言天張雲卷有時節吾徒莫歎抵觸藩于公白首
大梁野使人悵望何可論既知朱亥爲壯士且願束心
秋毫裏秦趙虎爭血中原當去抱關救公子裴生覽千

古龍鸞炳文一作章悲高吟雨雪動林木放書輟劍

思高堂勸爾一杯酒拂爾裘上霜爾為我楚舞吾為爾

楚歌且探虎穴向沙漠鳴鞭走馬凌黃河耻作易水別

臨岐淚滂沱

平臺夜遇李景參有別

高適

離心忽悵然策馬對秋天孟諸薄暮涼風起歸客相逢
渡睢水昨時攜手已十年今日分途各千里歲物蕭條
滿路岐此行浩蕩令人悲家貧羨爾有微祿欲往從之
何所之

贈酒泉韓太守

岑參

太守有能政遙聞如古人俸錢盡供客家計常清貧酒
泉西望玉關道千山萬積皆白草辭君走馬歸長安憶
君一作隱居倏忽令人老

贈從弟南平太守之遙

李白

少年不作一作得意落魄無安居願隨任公子欲釣吞舟
魚常時飲酒逐風景壯心遂與功名疎蘭生谷底人不
鋤雲在高山空卷舒漢家天子馳駟馬赤車蜀道迎相
如天門九重謁聖人龍顏一解四海春彤庭左右呼萬
歲拜賀明主收沈淪翰林秉筆迴英眄麟閣崢嶸誰可
見承恩初入銀臺門一作侍從著書獨在金鑾殿龍駒

古詩 卷二十五
雕鏗白玉鞍象牀綺食一作黃金盤當時笑我微賤者
却來請謁爲交歡一朝謝病遊江海疇昔相知幾人在
前門長揖後門關今日結交明日改愛君山嶽心不移
隨君雲霧迷所爲夢得池塘生春草使我長價登樓詩
別後遙傳臨海作可見羊何共和之

江夏贈韋南陵冰

胡驕馬驚沙塵起胡雛飲馬天津水君爲張掖近酒泉
我竄三巴九千里天地再新法令寬夜郎遷客帶霜寒
西憶故人不可見東風吹夢到長安寧期此地忽相遇
驚喜茫如墮煙霧玉簫金管喧四筵苦心不得申一作

一句昨日繡衣傾綠樽病如桃李竟何言昔騎天子大
宛馬今乘欵段諸侯門賴遇南平豁方寸復兼夫子持
清論有似山開萬里雲四望青天解人悶人悶還心悶
苦辛長苦辛愁來飲酒二千石寒灰重暖生陽春山公
醉後能騎馬別是風流賢主人頭陀雲月多僧氣山水
何曾稱人意不然一作能鳴笳按鼓戲滄流呼取江南兒
女歌棹謳我且爲君槌碎黃鶴樓君亦爲吾倒却鸚鵡
洲赤壁爭雄如夢裏且須歌舞寬離憂

贈裴迪

王維

不相見不相見來久日日泉水頭常憶同携手攜手本

古詩 卷二十五 十一
同心復歎忽分襟相憶今如此相思深不深

贈任華

高適

丈夫結交須結貧貧者結交結始親世人不解結交者
唯重黃金不重人黃金雖多有盡時結交一成無竭期
君不見管仲與鮑叔至今留名名不移

贈裴十四

李白

朝見裴叔則朗如行玉山黃河落天走東海萬里寫入
胸懷間身騎白黿不敢度金高南山買君顧徘徊六合
無相知飄若浮雲且西去

李白
南陵冰余江上乘興訪之遇尋顏尚書笑贈

南船正東風北船來自緩江上相逢借問君語笑一作

未了風吹斷聞君攜妓訪情人應爲尚書不顧身堂上

三千珠履客甕中百斛金陵春恨我阻此樂淹留楚一作

此江濱月色醉遠客山花開欲然春風狂殺人一日劇

三年乘興嫌太遲焚却子猷船夢見五柳枝已堪挂馬

鞭何日到彭澤長歌陶令前

寄狄明府

杜甫

梁公曾孫我姨弟不見十年官濟濟大賢之後竟陵遲
浩蕩古今同一體比看伯叔四十人有才無命百寮底
今者弟兄一百人幾人卓絕秉周禮在汝更用文章爲

長兄白眉復天啓汝門請從曾公一作翁說太后當朝多

巧計狄公執正在末年濁河終不污清濟國嗣初將付

諸武公獨廷諍守丹陛禁中冊決詔房陵前朝長老皆

流涕太宗社稷一朝正漢官威儀重昭洗時危始識不

世才誰謂茶苦甘如薺汝曹又宜裂土食身使門戶多

旌檠胡爲飄泊岷漢間干謁王侯頗歷詆况乃山高水

有波秋風蕭蕭露泥泥虎之饑下巉巖蛟之橫出清泚

早歸來黃污人衣一作土汗人眼易眯

寄王屋山人孟大融

李白

我昔東海上勞山餐紫霞親見安期公食棗大如瓜中

年謁漢主不愜還歸家朱顏謝春暉白髮見生涯所以

就金液飛步登雲車願隨夫子天壇上閒與仙人掃落

花

憶舊遊寄譙郡元參軍

憶昔洛陽董糟丘爲予天津橋南造酒樓黃金白璧買

歌笑一醉累月輕王侯海內賢豪青雲客就中與君一作

與君心莫逆迴山轉海不作難傾情倒意無所惜我向

淮南攀桂枝君留洛北愁夢思不忍別還相隨相隨迢

迢訪仙城三十六曲水迴縈一谿初入千花明萬壑度

盡松風聲銀鞍金絡倒平地漢東太守來相迎紫陽之

真人邀我吹玉笙餐霞樓上動仙樂嘈然宛似鸞鳳鳴
 袖長管催欲輕舉漢中一作東太守醉起一作酣舞手持錦
 袍覆我身我醉橫眠枕其股當筵意氣凌九霄星離雨
 散不終朝分飛楚關山水遥予既還山尋故巢君亦歸
 家一作西歸渡渭橋君家嚴君勇貔虎作尹并州遇戎虜五
 月相呼度太行摧輪不道羊腸苦行來北涼歲月深感
 君貴一作重義輕黃金瓊杯綺食青玉案使我醉飽無歸
 心時時出向城西曲晉祠流水如碧玉浮舟弄水簫鼓
 鳴微波龍鱗莎草綠興來攜妓恣經過其若楊花似雪
 何紅一作鮮妝欲醉宜斜日一作落花百尺清潭寫翠蛾翠

蟬嬋娟初月輝美人更唱舞羅衣清風吹歌入空去歌
 曲自繞行雲飛此時歡一作行樂難再遇西遊因獻長揚
 賦北闕青雲不可期東山白首還歸去渭橋南頭一遇
 君鄴臺之北又離羣問余別恨今一作知多少落花春暮
 爭紛紛一作樹落花送客何紛紛言亦不可盡情亦不可極
 呼兒長跪一作跪緘此辭寄君千里遙相憶
 上崔相渙繫潯陽獻作
 虛傳一片雨枉作陽臺神縱為夢裏相隨去不是襄王
 傾國人

投簡成華兩縣諸子

杜甫

古詩雜體 卷二十一 十一

赤縣官曹擁材傑軟裘快馬當冰雪長安苦寒誰獨悲
杜陵野老骨欲折南山豆苗早荒穢青門瓜地新凍裂
鄉里兒童項領成朝廷故舊禮數絕自然棄擲與時異
况乃踈頑臨事拙饑卧動卽向一句弊裘何止一作聯
百結君不見空墻日色晚此老無聲淚垂血

用投丹陽知己兼奉宣慰判官

李白

客從崑崙來遺我雙玉璞云是古之得道者西王母食
之餘食之可以凌太虛受之頗謂絕今昔求識江淮人
猶乎比石如今雖在卞和手 正憔悴了了知之亦
何益恭聞士有調相如始從鎬京還復欲鎬京去能上

秦王殿何時迴光一相眄欲投君保君年幸君持取無
棄捐無棄捐服之與君俱神仙

簡蘇僊

杜甫

君不見道邊廢棄池君不見前者摧折桐百年死樹中
琴瑟一斛舊水藏蛟龍丈夫蓋棺事始定君今幸未成
老翁何恨憔悴在 山中深山窮谷不可處霹靂魍魎兼
狂風

問寇校書雙谿

王維

君家少室西爲復少室東別來幾日今春風新買雙谿
定何似餘生欲寄白雲中

答張五弟

終南有茅屋前對終南山終年無客長閉關終日無心
長自閒不妨飲酒復垂釣君但能來相往還

早秋單父南樓酬竇公衡

李白

白露見日滅紅顏隨霜凋別君若俯仰春芳辭秋條泰
山嵯峨夏雲在疑是白波漲東海散為飛雨川上來遙
帷却卷清浮埃知君獨坐青軒下此時結念同懷者一作
所懷我閉南樓著一作道書幽簾清寂若一作仙居曾無

好事來相訪賴爾

一作

高文一起予

答杜秀才五松山見贈

昔獻長楊賦天開雲雨歡當時待詔承明裏皆道楊雄
才可觀勅賜飛龍二天馬黃金絡頭白玉鞍浮雲蔽日
去不返總為秋風摧紫蘭角巾東出商山道採秀行歌
詠芝草路逢園綺笑向人兩君解來一何好聞道金陵
龍虎盤還同謝朓望長安千峰夾水向秋浦五松名山
當夏寒銅井炎鑪歆九天赫如鑄鼎荆山前陶公矍鑠
呵赤電回祿睢盱揚紫煙此中豈是久留處便欲燒丹
從列仙愛聽松風且高卧颼颼吹盡炎氛過登崖獨立
望九州陽春欲一作奏誰相和聞君往年遊錦城章仇
尚書倒屣迎飛牋絡繹奏明主天書降問回恩榮駸麟

不能就珪組至今空揚高蹈名夫子工文絕世奇五松
新作天下推吾非謝尚邀彦伯異代風流各一時一時
相逢樂在今袖拂白雲開素琴彈為三峽流泉音從茲
一別武陵去去後桃花春水深

訓中都小吏携斗酒雙魚於逆旅見贈

魯酒若琥珀一作琥珀色汶魚紫錦鱗山東豪吏有俊氣手
携此物贈遠人意氣相傾兩相顧斗酒雙魚表情素下
有酒來我飲之鱸作別離處二句雙魚呀呷鬣張蹊刺銀盤欲飛去
呼兒拂机霜亦揮紅肌一作腮花落白雪霏為君下筯一
餐飽醉著金鞭上馬歸

答王十二寒夜獨酌有懷

昨夜吳中雪子猷佳興發萬里浮雲捲碧山青天中道
流孤月孤月滄浪一作波河漢清北斗錯落長庚明懷余
對酒夜霜白玉牀金井水崢嶸人生飄忽百年內且須
酣暢萬古情君不能狸膏金距學鬪鷄坐令鼻息吹虹
霓君不能學哥舒橫行青海夜帶刀西屠石堡取紫袍
吟詩作賦北窗裡萬言不直一杯水世人聞此一作皆
掉頭有如東風射馬耳魚目亦笑我謂一作請與明月同
驂騮拳跼不能食蹇驢得意一作志鳴春風折楊皇華合
流俗晉君聽琴枉清角巴人誰肯和陽春楚地由來賤

奇璞黃金散盡交不成白首為儒身被輕一談一笑失
 顏色蒼蠅貝錦喧謗聲曾參豈是殺人者纔言三及慈
 母驚與君論心握君手榮辱於予亦何有孔聖猶聞傷
 鳳麟董龍更是何鷄狗一生傲岸苦不諧恩疎媒勞志
 多乖嚴陵高揖漢天子何必長劍挂願事玉階達亦不
 足貴窮亦不足悲韓信羞將絳灌比禰衡耻逐屠沽兒
 君不見李北海英風豪氣今何在君不見裴尚書土墳
 三尺蒿棘一作高下居少年早欲五湖去見此彌將鐘鼎踈
 多雨殊未已秋雲更沈沈洛陽故人初解印山東小吏

崔司錄宅宴大理李卿

高適

來相尋上卿才大名不朽早朝至尊暮求友豁達常推
 和河南司載斟樽中酒飲醉欲言歸剡谿門前駟馬
 光照衣路傍觀者徒唧唧我公不以爲是非

東平蓬萊驛夜宴平盧楊判官醉後留別姚太守

置酒留宴

獨孤及

驛樓漲海壖秋月寒城邊相見自不足况逢主人賢夜
 清酒濃人如玉一斗何啻直十千木蘭爲樽金爲杯江
 南急管盧女絃齊童如花解郢曲起舞激楚歌採蓮固
 知別多相逢少樂極哀至心嬋娟少留莫辭醉前路方
 悠然明日分飛倘相憶祇應遙望西南天

龍門應制

宋之問

宿雨霽氛埃流雲度城闕河堤柳新翠苑樹花先發洛
 陽花柳此時濃山水樓臺映幾重羣公拂霧朝翔鳳天
 子乘春幸鑿龍鑿龍近出王城外羽從淋漓一作琳琅擁軒
 蓋雲蹕一作罕纔臨御水橋天衣已入香山會山壁蘄巖
 斷復連清流澄澈俯伊川塔影一作鴈塔遙遙綠波上星龕
 奕奕翠微邊層巒舊長千尋木遠壑初飛萬一作百丈泉
 綵仗紅一作幌旌遶香閣下輦登高望河洛東城宮闕擬
 昭回南陌溝塍殊綺錯林下天香七寶臺山中春酒萬
 年杯微風一起祥花落仙樂初鳴瑞鳥來鳥來花落紛

無已稱觴獻壽香一作霞裏歌舞淹留景欲斜石間

關猶駐五雲車鸞旗翼翼留芳草龍騎駉駉映晚花千

乘萬騎變輿出水靜山空巖警蹕郊外喧喧引看人傾

都南望屬車塵囂聲引颺開黃道王一作氣周回

入紫宸先王定鼎山河固寶命乘周萬物新吾君一作皇

不事瑤池樂時雨來觀農扈春

北山

王績

舊知山裏絕氛埃登高日暮心悠哉子平一去何時返
 仲叔長遊遂不來幽蘭獨夜清琴曲桂樹凌雲濁酒杯
 槁項同枯木丹心等死灰

丈人山

杜甫

自爲青城客不唾青城地爲愛丈人山丹梯近幽意丈人祠西佳氣濃綠雲擬住最高峰掃除白髮黃精在君看他時冰雪容

春臺望

玄宗

暇景屬三春高臺聊四望目極千里際山川一何壯太華見重巖終南分疊嶂郊原紛綺錯參差多異狀佳氣滿通溝遲步入綺樓初鷺一一鳴紅樹歸鴈雙雙一作隸隸洲太液池中下黃鶴昆明水上映牽牛聞道漢家全盛日別館離宮趣非一甘泉逶迤亘明光五柞連延

接未央周廬微道縱橫轉飛閣迴軒左右長須念作勞居者逸勿言我身一作後焉能恤爲想雄豪壯栢梁何如儉陋卑茅室陽烏黯黯向山沈夕鳥喧喧入上林薄暮賞餘回步輦還念中人罷百金

奉和

蘇頌

壯麗天之府神明王者宅大君乘飛龍登彼復懷昔圓闕朱光焰橫山翠微積河汧流作表縣聚開成陌卽舊在皇家維新具物華雲連所上居恒屬日更時中望不斜三月滄池搖積水萬年青樹綴新一作花暴羸國此嘗圖霸業後仁先以詐東破諸侯西入秦咸陽北阪

南渭津詩書焚蕪散學士高閣奢踰嬌美人事往覆輒
經遠喻春還按蹕憑高賦戎觀愛力深惟省越厭陳方
何足務清吹遙遙發帝臺宸文耿耿照天迴伯夷位事
愚臣忝喜奏聲成鳳鳥來

奉和

許景先

睿德在青陽高居視中縣秦城連鳳關漢寢疏龍殿文
物照光輝郊畿鬱葱蒨千門望成錦八水明如練複道
曉光披宸遊出禁移瑞氣朝浮五雲閣祥光夜吐萬年
枝蘭葉負龜初薦祉桐花集鳳更來儀秦漢生人凋九
役阿房甘泉構雲碧汾祠雍時望通天玉堂宣室坐長

年鼓鐘西接咸陽觀苑囿南通鄠杜田明主卑宮款刑
失輔德欽賢政惟一昆蟲不夭在春蒐稼穡常艱重農
術邦家已荷聖謨新猶聞儉陋惜中人豫奉北辰齊七
政長歌東武抃千春

奉和

賀知章

青陽布王道玄覽陶真性欣若天下春高逾域中聖神
臯類觀賞帝里如懸鏡繚繞八川浮岩嶮雙闕映曉色
徧昭陽晴雲卷建章華滋的皪丹青樹顥氣氤氳金玉
堂尚有靈蛇下鄜時還徵瑞寶入陳倉自昔秦奢漢窮
武後庭萬餘宮百數旗回五丈殿千門連綿南墜出西

古詩 卷二十一
垣廣畫螭蛾誇窈窕羅生玳瑁象崑崙廼睠天情興隱
恤古來土木良非一荆臨章觀一作楚趙叢臺何如堯
階將禹室層欄窅窅下龍輿清管逶迤半綺䟽一聽南
風引鸞舞長謠北極仰鵲居

初宿淮口

宋之問

孤舟汴河水去國情無已晚泊投楚鄉明月清淮裏汴
河東瀉路窮茲洛陽西顧日增悲夜聞楚歌思欲斷況
值淮南水一作木落時

宿蒲關東店憶杜陵別業

岑參

關門鎖歸客一夜夢還家月落河上曉遙聞秦樹鴉長

安二月歸正好杜陵樹邊純是花

下途歸石門舊居

李白

吳山高越水清握手無言傷別情將欲辭君挂帆去離
魂不散煙郊樹此心鬱悵誰能論有愧叨承國士恩雲
物共傾三月酒歲時同餞五侯門羨君素書常滿案舍
丹照白霞色爛余嘗學道窮冥筌夢中往往遊仙山何
當脫屣謝時去壺中別有日月天俛仰人間易凋朽鍾
峰五雲在軒牖惜別愁窺玉女牕歸來笑把洪厓手隱
居寺隱居山陶公鍊液栖其間靈神閉氣昔登攀恬然
但覺心緒閒數人不知幾甲子昨來猶帶冰霜顏我離

雖則歲物改如今了然識所在別君莫道不盡歡懸知
樂客遙相待石門流水徧桃花我亦曾到秦人家不知
何處得雞豕就中仍見繁桑麻翛然遠與世事間裝鸞
駕鶴又復遠何必長從七貴遊勞生徒聚萬金產揖君
去長相思雲遊雨散從此辭欲知悵別心易苦向暮春
風楊柳絲

桂州三月三日

宋之問

代業京華裏遠投魑魅鄉登高望不極一作雲海四茫
茫伊昔承休盼曾爲人所羨兩朝賜顏色二紀陪遊
一作歡宴昆明御宿侍龍媒伊闕天泉復幾迴西夏黃河水

心劍東周清洛羽觴杯苑中落花掃還合河畔垂楊撥
不開千春獻壽多行樂柏梁和歌攀睿作賜金分帛奉
恩一作駐光輝風舉雲搖入紫微晨趨北闕鳴珂至夜出南
宮把燭歸載筆儒林多歲月襍被文昌佐吳越越中山
海高且深興來無處不登臨永和九年刺海郡暮春三
月醉山陰愚謂嬉遊長似昔不言流寓歛成今始安繁
華舊風俗帳飲傾城沸江曲主人絲管清且悲客子肝
腸斷還續荔浦蘅臯萬里餘洛陽音信絕能疎故園今
日應愁思曲水何能更袞除作伴誰憐合浦葉思歸豈
食桂江魚不求漢使金囊贈願得佳一作家人錦字書

送王七尉松滋得陽臺雲 孟浩然

君不見巫山神女作行雲霏紅杏翠曉氛氲嬋娟流入

楚一作襄王夢倏忽還隨零雨分空中飛去復飛來朝朝

暮暮下陽臺愁君此去為仙尉便逐行雲去不廻

雨後公超谷北原眺望寄高拾遺 獨孤及

崖口雨足收清光洗高天虹蜺歛殘靄山水含碧鮮遠

空霞破露月輪薄雲片片成魚鱗五陵如薺渭如帶日

極千里關山春朝來爽氣未易說盡取花峰贈遠人

復陰 杜甫

方冬合沓玄陰塞昨日晚晴今日黑萬里飛蓬映天過

孤城樹羽揚風直江濤簸岸黃沙走雲雪埋山蒼
君不見夔子之國杜陵翁牙齒半落左耳聾

雪中憶李楫 王維

積雪滿阡陌故人不可期長安千門復萬戶何處躑躅

黃金羈


艷情代郭氏答盧照隣 駱賓王

迢迢芊路望芝田眇眇函關限蜀川歸雲已落涪江外

還鴈應過洛水灑洛水傍連帝城側帝宅層甍垂鳳翼

銅駝路上柳千條金谷園中花幾色柳葉園花處處新

洛陽桃李應芳春妾向雙流窺石鏡君住三川守玉人



此時離別那堪道此日空牀對芳沼芳沼徒遊比目魚
幽徑還生拔心草流風迴雪儻便娟驥子魚文實可憐
擲果河陽君有分貨酒成都妾亦然莫言貧賤無人重
莫言富貴應須種綠珠猶得石崇憐飛燕曾經漢皇寵
良人何處醉縱橫直如循默守空名倒提新縑成慊慊
翻將故劍作平平離前吉夢成蘭兆別後啼痕上竹生
別日分明相約束已取宜家成誠勗當時擬弄掌中珠
豈謂先摧庭際玉悲鳴五里無人問腸斷三聲誰爲續
思君欲上望夫臺端居懶聽將雛曲沈沈落日向山低
簷前歸燕並頭栖抱膝當窗看夕兔側耳空房聽曉雞

舞蝶臨階祗自舞啼鳥逢人亦助啼獨坐傷孤枕春來
悲更甚峨眉山上月如眉濯錦江中霞似錦錦字迴文
欲贈君劍壁層峰自糾紛平江一作沙淼淼分清浦長路
悠悠間白雲也知京洛多佳麗也知山岫遙虧蔽無那
短封卽踈索不在長情守期契傳聞織女對牽牛相望
重一作銀河隔淺流誰分迢迢經兩歲誰能脈脈待三秋
情知唾井終無理情知覆水也難收不復下山能借問
更向盧家字莫愁

代秦女贈行人

劉希夷

鸞鏡曉含春蛾眉向影嚔開衣裳破那堪粉黛新春

古詩 卷二十五 二十五
還洛陽道爲憶春堦草楊葉未能攀梅花待君掃今朝
喜鵲傷人飛應是狂夫走馬歸遙想行歌共遊樂迎前
含笑着春衣

寄遠

二首

李白

憶昨東園桃李紅碧枝與君此時初別離金瓶落井無
消息令人行歎復坐思坐思行歎成楚越春風玉顏畏
銷歇碧牕紛紛下落花青樓寂寂空明月兩不見但相
思空留錦字表心素至今緘愁不忍窺

愛君芙蓉嬋娟之艷色一作色可餐一作今難再得憐君水
玉清迴之明心情不極今意已深朝共琅玕之綺食夜

同鴛鴦之錦衾恩情婉變忽爲別使人錯莫亂愁心亂
愁心涕如雪寒燈厭夢竟欲絕覺來相思生白髮盈盈
漢水若可越可惜凌波步羅襪美人美人兮歸去來莫
作朝雲暮雨兮飛陽臺

秋思

一作三五七言

秋風清秋月明落葉聚還散寒鴉棲復驚相思相見知
何日此時此夜難爲情

代美人愁鏡

美人贈此盤龍之寶鏡燭我金縷之羅衣時將紅袖拂
明月爲惜普照之餘輝影中金鵲飛不滅臺下青鸞思

獨絕藁砧一別若箭弦去有日來無年狂風吹却妾心
斷玉筋并墮菱花前

攜妓登梁王棲霞山孟氏桃園中

碧草已滿地柳與梅爭春謝公自有東山妓金屏笑坐
如花人今日非昨日明日還復來白髮對綠酒強歌心
已一作摧君不見梁王池上月昔照梁王樽酒中梁王
已去明月在黃鸝愁醉啼春風分明感激眼前事莫惜
醉卧桃園東

聽董大彈胡笳聲兼寄語弄房給事

李頎

蔡女昔造胡笳聲一彈一十有八拍胡人落淚沾一作

邊草漢使斷腸對歸客古戍蒼蒼烽火寒大荒沈一作

沈飛雪白先拂商弦後角羽四郊秋葉驚撼撼董夫子

通神明深松一作竊聽來妖精言遲更速皆應手將往

復旋如有情空山百鳥散還合萬里浮一作雲陰且晴

一作嘶酸雛鴈失羣夜斷絕胡兒戀母聲川爲靜其波

鳥亦罷其鳴烏孫一作部落家鄉遠邏娑沙塵哀怨生

幽音變調忽飄灑長風吹林雨墮瓦迸泉颯颯飛木末

野鹿呦呦走堂下長安城連東掖垣鳳凰池對青瑣門

高才脫略名與利日夕望君抱琴至

春桂問答 二首

王績

問春桂桃李正芬華年光隨處滿何事獨無花
春桂答春華詎能久風霜搖落時獨秀君知不

十月梅花書贈

盧僎

君不見巴鄉氣候與華別年年十月梅花發上苑今應
雪作花寧知此地花爲雪自從遷播落黔巴三見江上
開新花故園風光虛洛汭窮峽凝雲度歲華花情縱似
河陽好客心倍傷邊候早春候颯驚樓上梅霜威未落
江潭草江水侵天去不還梅花覆簾空坐攀一向花前
看白髮幾回夢裏憶紅顏紅顏白髮雲泥改何異桑田

移碧海却想華年故國時唯餘一片空心在空心弔影
向誰陳雲臺仙閣舊遊人儻知巴樹連冬發應憐南國
氣長春

薔薇

儲光羲

裊裊長數尋青青不作林一莖獨秀當庭心數枝分作
滿庭陰春日遲遲欲將半庭影離離正堪翫枝上嬌鶯
不畏人葉底飛蛾自相亂秦家女兒愛芳菲畫眉相伴
采葦蕤高處紅鬚欲就手低邊綠刺已牽衣葡萄架上
朝光滿楊柳園中暝鳥飛連袂踏歌從此去風吹香氣
逐人歸

和題藤架

獨孤及

尊尊葉成幄
瓊瓊花落架
花前離心苦
愁至無日夜
人去藤花千里
強藤花無主
為誰芳相思
歷亂何由盡
春日迢迢如線長

見薛大臂鷹作 一作李白

高適

寒楚 一作冬 十二月蒼鷹八九毛
寄言燕雀莫相啁 一作忌

自有雲霄萬里高

觀博平王志安少府山水粉壁 李白

粉壁為空天
丹青狀江海
游雲不知歸
日見白鷗在
博平真人王志安
沈吟至此願挂冠
松谿石磴帶秋色
愁

客思歸坐曉寒

同李九士曹觀壁畫雲作

高適

始知帝鄉客
能畫蒼梧雲
秋天萬里一片色
只疑飛盡猶氛氲

自漢陽病酒歸寄王明府

李白

去歲左遷夜
郎道琉璃硯
水長枯槁今歲
敕放巫山陽
蛟龍筆翰生輝
光聖主還聽子
虛賦相如却欲
與 一作論
文章願掃鸚鵡
洲與君醉百場
嘯起白雲飛七
澤歌吟淥水動
三湘莫惜連船
沽美酒千金一
擲買春芳

醉為馬墜諸公攜酒相看

杜甫

甫也諸侯老賓客罷酒酣歌拓金戟騎馬忽憶少年時
散蹄逆落瞿塘石白帝城門水雲外低身直下八千尺
粉堞電轉紫遊韁東得平岡出天壁江村野堂爭入眼
垂鞭鞞控凌紫陌向來皓首驚萬人自倚紅顏能騎射
安知決臆追風足朱汗駢驪猶噴玉不虞一蹶終損傷
人生快意多所辱職當憂戚伏衾枕况乃遲暮加煩促
朋知來問腆我顏杖藜強起依僮僕語盡還成開口笑
提攜別掃清谿曲酒肉如山又一時初筵哀絲動豪竹
共指西日不相貸喧呼且覆盃中綠何必走馬來爲問
君不見嵇康養生被殺戮

賦得浣紗石

送祝八之江東

李白

西施越谿女明豔光雲海未

一作來

入吳王宮殿時浣紗

古一作故

石今猶在桃李新開映古查菖蒲猶短出平沙

昔時紅粉

一作顏

照流水今日青苔覆落花君去西秦適

東越碧山清江幾超忽若到天涯思故人浣紗石上窺
明月

訓張司馬贈墨

上黨碧松烟夷陵丹砂末蘭麝凝珍墨精光乃堪掇黃
頭奴子雙鷗鬢錦囊養之懷袖間今日贈余蘭亭去興
來灑筆會稽山

詠馬鞭

高適

龍竹養根凡幾年工人截之為長鞭一節一目皆天然
珠重重星連連繞指柔純金堅繩不直規不圓把向空
中捎一聲良馬有心日馳千

登鄴城懷古

岑參

下馬登鄴城城空復何見東風吹野火暮入飛雲殿一作
入暮飛城隅南對望陵臺漳水東流不復回武帝宮中
雲電人去盡年年春色為誰來

登戲馬臺懷古

儲光羲

君不見宋公杖鉞討燕後英雄踴躍爭趨走小會衣冠

呂梁壑大徵甲卒碣磳口天開神武樹元勳九日茱萸
饗六軍泛泛樓船遊極浦搖搖歌吹動浮雲居人滿目
市朝變霸業猶存齊楚甸泗水南浮一作桐柏川沂山
北走瑯琊縣滄海沈沈晨霧開彭城烈烈秋風來少年
自言未得意日暮蕭條登古臺

宣州謝朓樓懷古餞校書叔雲

一作陪侍御叔華登樓歌

李白

棄我去者昨日之日不可留亂我心者今日之日多煩
憂長風萬里送秋鴈對此可以酣高樓蓬萊文章建安
骨中間小謝又清發俱懷逸興壯思飛欲上青天一作

覽日月抽刀斷水水更流舉盃銷愁愁更一作復愁人生一作男兒在世不稱意明朝舉棹還滄洲一作散髮弄扁舟

雪讒詩 贈友人

嗟予沈迷猖獗已久五十知非古人常有立言補過庶存不朽包荒匿瑕蓄此頑醜月出致譏貽愧皓首感悟遂晚事往日遷白壁何辜青蠅屢前羣輕折軸下沈黃泉衆毛飛骨上凌青天萋菲暗成貝錦粲然泥沙聚埃珠玉不鮮洪燄爍山發自織煙蒼波蕩日起乎微涓交亂四國播于八埏拾塵掇蜂疑聖猜賢哀哉悲夫誰察予之貞堅彼婦人之猖狂不如鵠之疆疆彼婦人之淫

昏不如鵠之奔奔皎皎

坦一作蕩

君子無悅簧言擢髮贖罪

乃孔多傾海流惡惡無以過人生實難逢此織羅積毀銷金沈憂作歌天未喪文其如余何妲已滅紂褒女惑周天維蕩覆臧此之由漢祖呂氏食其在傷秦皇太后毒亦淫荒躑躅作昏遂掩太陽萬乘尚爾匹夫何傷辭殫意窮心切理直如或妄談昊天是殛子野善聽離婁至明神靡遁響鬼無逃形不我遐棄庶昭忠誠

自溧水道哭王炎

王公希代寶棄世亦何早弔死不及哀殯宮已秋草悲來欲脫劍挂向何枝好哭向茅山雖未摧一生淚盡丹

陽道

寄崇梵僧

王維

崇梵僧崇梵僧秋歸覆釜春不還落花啼鳥紛紛亂澗
戶山牕寂寂閒峽裏誰知有人事郡中遙望空雲山

同比部楊員外十五夜遊有懷靜者季

承明少休沐建禮省文書夜漏行人息歸鞍落日餘懸
知三五夕萬戶千門闕夜出曙翻歸傾城滿南陌陌頭
馳騁盡繁華王孫公子五侯家由來月明如白日共道
春燈勝百花聊看侍中千寶騎強識小婦七香車香車
寶馬共喧闐箇裏多情俠少年競向長楊柳市北肯過

精舍竹林前獨有仙郎心寂寞却將宴坐為行樂儻覺
忘懷共往來幸霑同舍甘藜藿

贈西嶽山人李岡

岑參

君隱處當一星蓮花峯頭飯黃精仙人掌上演丹經鳥
可到人莫攀隱來十年不下山袖中短一作書誰為達
華陰道士賣藥還

華劍士賣藥

可怪入莫攀劉來十半不下山嶺中

吾劉當一星蘇峯既對黃龍山人掌土寅其

西嶽山人李固

岑參

公劉共卦來幸露同舍甘藜藿

蘇舍竹林前

唐詩所第二十六卷

古詩

前集

風體

鳴琴

四章序曰冬十有二月家君宰邑許下夫子

室列座有位尊甲儼如或捧觴上壽或振衣請

益始崇詩以閱禮終講信以脩睦然後文飽於

德義潤其身頃夫子升堂之後若盧賈劉尹之

徒半紀間接武鳴躍實夫子訓之導之所致也

今殷郭二子天資才幹而加之鏃羽上觀王庭

俯拾地芥其誰曰不然飛霜藹林寒氣總至月

落匝戶夜將向晨座隅謙謙畢醉溫克則知孔

門宴集異於他日二三子終身識之夫子以家

君政成百里無事命門弟子賦詩鳴琴亦以釋

此離之怨焉小子不敏忝居門人之末敢不敬

書其事 息夫牧

有琴斯鳴于宰之庭君子蒞止其心孔平政既告成德

古詩 風體

卷二十六

一

以永貞其一鳴琴有術于頴之畔彼之才髦其年未冠聞
詩聞禮斐子璨璨其二鳴琴其怡于頴之湄二子翰飛言
戾京師有鬱者桂載攀其枝其三琴既鳴矣宵既清矣烘
煖有燁酒醴惟旨喟我寢歎吁其別矣其四

涼雨

序曰涼雨志楊侯樂賓僚也

蕭穎士

習習涼風泠泠浮颺君子樂胥于其賓僚有女斯天式
歌且謠欲言終宥惟以招邀于胥樂兮

江有楓

十章序曰江有楓思陸鄭二友吳會舊遊且疾讒也臣宦于尹府以直方不偶見逼讒佞惟古之賢者有避色避言之義矯然去之二室之間有楓樹焉與江南楓形胥類憩于其下而作是詩以貽夫二三子焉

江有楓其葉蒙蒙我友自東于以遊從其一山有槭其葉
漠漠我友徂北于以休息其二想彼槭矣亦類其楓矧伊
懷人而忘其東其三東可遊矣會之丘矣于山于水于廟
于寺于亭于里君子遊焉于以宴喜其樂疊疊其四粵東
可居彼吳之墟有田有庭有朋有書有蓐有魚君子居
焉惟以宴醕其樂徐徐其五我朋在矣彼陸之子如松如
杞淑問不已其六我友于征彼鄭之子如琇如英德音孔
明其七我思震澤菱芡幕幕寤寐如覲我思剡谿杉篠萋
萋寤寐無迷其八有鳥有鳥粵鷗與鷺浮湍戲渚皓然潔
素忘其猜妬彼何人斯曾足傷懼其九此懼惟何懼寘于

羅彼驕者子讒言孔多我聞先師體命委和公伯之愬
則如予何悵然山河惟以嘯歌其憂也哉其十

菊榮五章序曰菊榮酬贈離且申志也久寓大邑賢宰宋侯惠而好予賦鳴蟬以貺別有懷相規備厥卒章予以報焉

采采者菊芬其榮斯紫英黃萼照灼丹墀愷悌君子佩
服攸宜王國是維大君是毗貽爾子孫百祿萃之其采
采者菊于邑之城舊根新莖布葉垂英彼美淑人應家
之禎有絃既鳴我政則平宜爾棟崇必復其慶其采采
者菊于邦之府陰槐翳柳邇楹近宇彼勞者子喧卑是
處慨其莫知蘊結誰語企彼高人色斯遐舉其采采者

菊于賓之館既低其枝又弱其幹有斐君子是焉披翫
良辰旨酒宴飲無美愴其此別終然永歎其歲方晏矣
霜露殘促誰其榮斯有英者菊豈微春華懿此貞色人
之侮我混于薪棘詩人有言好是正直其五

有竹一篇七章序曰有竹懿李新後閭而宴親友也

有竹斯竿于閣之前君子秉心惟其貞堅兮其有竿斯
竹于閣之側君子秉操惟其正直兮其彼蔚者竹蕭其
森矣有開者閤宛其深矣迴簷幽砌如翼如齒其冬之
宵霰雪斯漉我有金鑪燻其以歆其夏之日炎景斯鬱
我有珍簟淒其以栗其彼紛者務體其豫矣有旨者酒



歡其且矣其六友僚萃止跗萼載韡彼美公之姓兮那歟
應積慶今期子惟去之柄兮其七

蟬鳴

五章序曰蟬鳴感秋興送將歸也僻守外邑而蘭陵子相過詰朝言歸賦詩見志以申贈

焉

宋華

蟬其鳴矣於彼踈桐庇影容跡何所不容嘒嘒其長永
託於風未見君子我心忡忡既見君子樂且有融其彼
蟬鳴矣於林之表含風飲露以樂吾道有懷載遷伊誰
云保未見君子我心悄悄既見君子披豁予抱其蟬鳴
蟬鳴幽暢乎而蕭蕭爾庭遠近涼颺言赴高柳叢篁間
之思而不見如渴如饑亦既覲止我思則夷其蟬鳴伊

何時運未與匪歎秋徂怨斯路阻願言莫從鬱悒誰語
君子至止慰我延佇何斯違斯倏爾遐舉其歲之秋深
蟬其夕吟披衣軒除蕭蕭風林我友來斯言告離衿何
以叙懷臨水鳴琴何以贈言委順浮沈其五

騷體

以國子司業召須尉袁廣餞于小洞庭

蘇源明

浮漲湖兮莽條遙川后禮兮扈予橈橫增沃一作今蓬
仙延川后福兮易一作翼予船月澄凝兮明空波星磊落
兮耿秋河夜既良兮酒且多樂方作兮柰別何

答宋之問

司馬承禎

時既暮兮節欲春山林寂兮懷幽人登奇峰兮望白雲
悵緬邈兮象欲紛白雲悠悠去不返寒風颼颼吹日晚
不見其人誰與言歸坐彈琴思逾遠

宴濮陽守崔季重魯郡李蘭濟南田琦濟陽李陵

于洄源亭

蘇源明

小洞庭兮寓方舟風嫋嫋兮離平流寓方舟兮小洞庭
雲微微兮連絕崕層瀾壯兮緬以沒重巖轉兮超以忽
馮夷逝兮護輕橈蛟龍行兮落增潮泊中潮兮澹而閒
並曲淑兮悵而還適予手兮非予期將解袂兮藜予思

尚君子兮壽厥身承明主兮憂斯人

白鼇渦

王維

南山之瀑水兮激石湍瀑以雷驚人相對兮不聞語聲
翻渦跳沫兮蒼苔濕蘚老且厚春草爲之不生獸不敢
驚動鳥不敢飛鳴白鼇渦濤戲瀨一作漱今委身以縱橫
主人之仁兮不網不釣得遂性以生成

嵩山十首

盧鴻

山爲宅兮草爲堂芝蘭兮葯房羅蘚蕪兮拍薜荔荃壁
兮蘭砌蘚蕪薜荔兮成草堂陰陰邃兮馥馥香中有人
兮信宜常讀金書兮飲玉漿童顏幽操兮不易長右草堂


天門豁兮僊臺聳傑屹崒兮零瀕湧窮三休兮曠一觀
忽若登崑崙兮中期汗漫僊聳天開兮倒景臺鯨顯氣
兮軼囂埃皎皎之子兮自獨立雲可朋兮轂可吸曾何
榮辱之所及 右倒景臺

紫巖隈兮青磨側雲松煙蕙兮千古色芳藿藤兮蔭蒙
龍幽人構館兮在其中霍藤蒙龍兮開樾館卧風霄兮
坐轂一作楸旦粵有賓兮時戾止樵蘇不爨兮清談已永
歲終朝兮常若此 右樾館

臨泱泱兮背青熒吐雲煙兮合窅冥悅歛翕兮杳幽藹
意縹緲兮羣仙會窅冥仙會兮枕煙庭竦魂形兮凝視
德門夫至誠必感兮祈此巔契一作潔顯氣養丹田終彷彿
像兮觀靈仙 右枕煙庭

水攢衝兮石叢聳煥雲錦兮噴洶湧苔駁皴兮草黃綠
芳纂纂兮瀨濺濺石攢叢兮雲錦淙波連珠兮文沓絳
有潔冥一作員者媚此幽漱靈液兮樂天休實獲我心兮
夫何求 右雲錦淙

霏微陰壑兮氣騰虹迤邐危磴兮上凌空青霞杪兮紫
雲垂鸞歌鳳舞兮吹參差鸞歌鳳舞兮期仙磴鴻駕迎
兮瑤華贈山中兮好神仙想像聞此兮欲升煙鑄月
煉液兮竚還年 右期仙磴



靈磯盤礴兮溜奔錯漱冷風兮鎮冥壑研苔滋兮泉珠
潔一飲一憩兮氛想滅磷漣清淬兮滌煩磯靈仙境兮
仁智歸中有琴兮徽以玉峨峨湯湯兮彈此曲寄聲知
音兮同所欲 右滌煩磯

青崖陰兮月磻曲重幽疊兮兮隱淪躅草拊懸幕兮翠
蒙籠當其無兮庭在中當無有用兮幕翠庭神可谷兮
道可冥有幽人兮張素琴白玉徽兮綠水陰德之惜兮

澹多心 右幕翠庭

嵐氣蕭兮巖翠冥空陰虛兮戶芳迎披蕙帳兮促蘿筵
談空空兮覈元元蕙帳蘿筵兮洞元室秘而幽兮真可

自然兮道可冥澤妙思兮草玄經結幽門兮在黃

右洞元室

水碧色兮石金光灑熠熠兮澗湟湟泉葩映兮煙蕙臨
紅灼灼翠陰陰翠相鮮兮金碧潭霜天洞兮煙景涵有
幽人兮好冥絕炳其煥兮凝其潔悠悠千古兮長不滅

右金碧潭

代寄情

李白

君不來兮徒蓄怨積思而孤吟雲陽一去已遠隔巫山
綠水之沈沈留餘香兮染繡被夜欲寢兮愁人心朝馳
余馬於青樓恍若空而夷猶浮雲深兮不得語却惆悵

而懷憂使青鳥兮銜書恨獨宿兮傷離居何無情而兩
絕夢雖往而交踈橫流涕而長嗟折芳洲之瑤華送飛
鳥以極目怨夕陽之西斜願爲連根同死之秋草不作
飛空之落花

山水粉圖

陳子昂

山圖之白雲兮若巫山之高丘紛羣翠之鴻溶又似蓬
瀛海水之周流信夫人之好道愛雲山以幽求

懷魯

程彌綸

曲阜國尼丘山周公邈難問夫子猶啓關履風雩兮若
見游夏興兮魯顏天孫天孫何爲今兮學且難負星明之

而遊閒閒

獄中作

盧照隣

夫何秋夜之無情兮皎晶悠悠而太長園戶杳其幽邃
兮愁人披此嚴霜見河漢之西落聞鴻鴈之南翔山有
桂兮桂有芳心思君兮君不將憂與憂兮相積歡與歡
兮兩忘風嫋嫋兮木紛紛凋綠葉兮吹白雲寸步千里
兮不相聞思公子兮日將曛林已暮兮鳥羣飛重門掩
兮人逕稀萬族皆有所托兮蹇獨淹留而不歸

送老工武員外學士使嵩山置舍利塔

徐堅

伊川別騎灞岸分筵對三春之花月覽千里之風煙望
青山兮分地見白雲兮在天寄愁心於樽酒愴離緒於
清絃共握手而相顧各銜一作含悽而黯然

前題

張說

懷玉泉戀仁者寂滅真心不可見空留影塔嵩巖下寶
王四海轉千輪企雲百粒送分身山中二月娑羅會虛
唄遙遙愁思人我念過去微塵劫與子禪門同正法躡
在神仙蘭省間常持清淨蓮花葉來亦好去亦好了觀
車行馬不移當見菩提離煩惱

唐詩所第二十六卷終

唐詩所第二十七卷

律詩

前集

五言

雜詩 四首

沈佺期

鐵一作汗馬三軍去金閨一作流鶯二月還邊愁離一作行上國

春夢失一作度陽關池水瑠璃淨園花玳瑁斑歲華空自

擲愁怨一作憂思不勝顏

落葉驚秋婦高砧促暝機蜘蛛尋月度螢火傷人飛清

鏡紅埃入孤燈綠焰微怨啼能至曉獨自嬾縫衣

妾家臨渭北春夢著遼西何苦朝鮮郡年年事鼓鼙燕

來紅壁語鶯向綠牕啼為許長相憶闌干玉筍齊

聞道黃花一作龍戍頻年不解兵可憐閨裏月長在漢家營少婦今春意良人昨夜情誰能將旗鼓一為取龍城

雜詩 二首

盧象

家居五原上征戰是平生獨負山西勇誰當塞下名死生遼海戰雨雪薊門行諸將封侯盡論功獨不成君家御溝上垂柳夾朱門列鼎會中貴鳴珂朝至尊死生在片議窮達由一言須識苦寒士莫矜狐白溫

雜詩

王維

雙燕初命子五桃新作花王昌是東舍宋玉次西家小不能織綺時時出浣紗親勞使君問南陌駐香車

感遇

楊賁

貴人昔未貴咸願顧寒微及自登樞要何曾問布衣平明登紫閣日晏下彤闈擾擾路傍子無勞歌是非

詠史

徐九臯

亡國秦韓代榮身劉項年金槌擊政後玉斗碎增前聖主稱三傑明離保四賢已申黃石祭方慕赤松仙

讀前漢外戚傳

李嶷

人錄尚書事家臨御路傍鑿池通渭水避暑借明光印綬妻封邑軒車子拜郎寵因宮掖裏勢極必先亡

詠馮昭儀當熊

賈至

白羽插雕弓 蜺旌動朔風 平明出金屋 扈輦上林中 逐獸長廊靜 呼鷹御苑空 王孫莫諫獵 賤妾解一作當熊

擬阮公體

徐晶

秦王按劍怒發卒 戍龍沙 雄圖尚未畢 海內已紛拏 黃塵暗天起 白日斂精華 唯見長城外 僵屍如亂麻

送金城公主適西蕃

奉和聖製

沈佺期

金牓扶丹掖 銀河屬紫闈 那堪將鳳女 還以嫁烏孫 玉就歌中怨 珠辭掌上恩 西戎非我匹 明主至公存

前題

劉憲

外館踰河右 行營指路岐 和親悲遠嫁 忍愛泣將離 旌

加羌風引軒車 漢月隨那堪 馬上曲時向管中吹

前題

李適

絳河從遠聘 青海赴和親 月作臨邊曉 花為度隴春 主歌悲顧鶴 帝策重安人 獨有瓊簫去一作悠悠思錦輪

前題

趙彥昭

聖后經綸遠 謀臣計畫多 受降追漢策 築館許戎和 俗化烏孫壘 春生積石河 六龍今出餞 雙鶴願為歌

前題

徐彥伯

鳳宸憐簫曲 鸞閨念掌珍 羗庭遙築館 廟策重和親 星轉銀河夕 花移玉樹春 聖心悽迭遠 留蹕望征塵

前題

韋元旦

柔遠安夷俗和親重漢年軍容旌節送國命錦車傳琴
曲悲千里簫聲戀九天唯應西海一作漢西月來就掌珠圓

前題

薛稷

天道寧殊俗慈仁一作深恩乃戢兵懷荒寄赤子忍愛鞠蒼
生月下瓊娥去星分寶婺行關山馬上曲相送不勝情

前題

李嶠

漢帝撫戎臣絲言命錦輪還將弄機女遠嫁織皮人曲
怨關山月粧消道路塵所嗟穠李樹空對小榆春

前題

徐堅

星漢下天孫車服降殊蕃匣中詞易切馬上曲虛繁關
塞移朱帳風塵暗錦軒簫聲去日遠萬里望河源

前題

唐遠哲

皇恩睠下人割愛遠和親少女風遊兌姮娥月去秦龍
笛迎金榜驪歌送錦輪那堪桃李色移向虜庭春

前題

張說

青海和親日潢星出降時戎王子壻寵一作禮漢國舅家
慈春野開離讌雲天起別詞空彈馬上曲詎減鳳樓思

一作悲

前題

崔湜

懷戎前策備降女舊姻修簫鼓辭家怨旌旃出塞愁尚
孩中念切方遠御慈留一作流顧乏謀臣用仍勞聖主憂

前題

馬懷素

帝子今何去重姻適異方離情愴宸掖別路遶關梁望
絕園中柳悲纏陌上桑空餘願黃鶴東顧憶迴翔

前題

鄭愔

下嫁戎庭遠和親漢禮優笳聲出虜塞簫曲背秦樓貴
主悲黃鶴征人怨紫駟皇情眷億兆割念俯懷柔

前題

閔朝隱

甥舅重親地君臣厚義鄉還將貴公主嫁與耨檀一作

王鹵薄山川濶一作閭琵琶一作胡琴道路長迴瞻父母國

出在東方

前題

蘇頌

帝女在天津和戎轉屬一作綺輪川經斷腸望地與析支
隣奏曲風嘶馬銜悲月伴人旋知偃兵革長是漢家親

前題

武平一

廣化三邊靜通姻四海安還將膝下愛持副域中歡聖
念飛玄藻仙儀下白蘭日斜征蓋沒歸騎動鳴鑾

送鄭大夫惟忠從公主入蕃

張說

鳳吹遙將斷龍旗送欲還傾都邀節使傳酌緩離顏春

律詩 卷二十一 五
積沙連海秋城月對關和戎應賞魏定遠莫辭班

送人隨大夫和蕃

儲光羲

西方有六國國願來賓聖主今無外懷柔遣使臣大
夫開幕府才子作行人解劍遙一作聊相送秦城二月春

送高郎中北使

陳子昂序曰蓋聞北夷不羈之日
已久天子垂玄默穆皇風而狼居

革心蟻伏請職高郎中奉詔出使載馳錦車諭
意雲幕且欲頓單于之膝受呼韓之朝不踰青
春復命紫闕其忠臣烈夫之節感激壯矣朝廷
以遠赴絕國追送近郊登熊山望鴈塞黃雲千
里亭臯悠然僉曰賦詩以贈行

杜審言

北狄願和親東京發使臣馬銜邊地雪衣染異方塵歲
月催行旅恩榮變苦辛歌鐘期重錫拜手落花春

送何員外使湖南

獨孤及

夙昔皆黃綬差池復瑣闈上田無晚熟逸翮果先飛前
路舟休繫故山雲不歸王程儻未復莫遣鯉書稀

送陸侍御餘慶北使

沈佺期

古人貴將命之子出輜軒受委當不辱隨時敢贈言朔
途際遼海春思繞轅轅安得回白日留歡盡綠樽

送姚侍御出使江東

宋之問

帝憂河朔郡南發海陵倉坐歎青春別逶迤碧水長飲
水朝受命衣錦晝還鄉為問東山桂無人何自芳

送靳十五侍御使蜀

孫逖

天使出霜臺行人擇吏才傳車春色送離興夕陽催驛
遶巴江轉關迎劍道開西南一何幸前後二龍來

送十五弟侍御使蜀

杜甫

喜弟文章進添余別興牽數杯巫峽酒百丈內江船未
息豺狼鬪空催犬馬年歸朝多便道搏擊望秋天

送魏兵曹使鶴州

得登字

陳子昂

陽山滃霧雨之子慎攀登羗竿多珍寶人言有愛憎欲

一作酬明主惠當盡使臣能勿以王陽道一作迢遞一作

道畏峻嶒

閬州送二十四舅使自京赴青城

杜甫

道王喬鳥名因太史傳如何碧雞使把詔紫微天秦

嶺愁回馬涪江醉泛船青城漫污雜吾舅意淒然

送盧少府使秦

孟浩然

楚關望秦國相去千里餘州縣勤王事山河轉使車祖

筵江上列離恨別前書願及芳年賞嬌鶯二月初

送楊錄事充使

岑參

夫子方寸裏清秋澄霽江關西望第一郡內政無雙狹
室下珠箔連宵傾玉缸使乎仍未醉斜月隱高一作牕

送劉高郵稅使入都

祖詠

常聞積歸思昨夜又兼秋鄉路京華遠王程江水流吳

律詩 卷二十一
歌喧兩岸楚客醉孤舟漸覺潮初上悽然多暮愁

水亭送劉顥使還歸節度

得低字

岑參

無計留君住應須絆馬蹄紅亭莫惜醉白日眼看低解
帶憐高柳移牀愛小谿此來相見少王一作事各東西

送使峽中

李白

風靜楊柳垂看花又別離幾年同在此今日共驅馳峽
裏聞猿叫山頭見月時慙慙一杯酒珍重歲寒姿

送友人使夷陵

崔翹

猿鳴三峽裏行客舊霑裳復道從茲去思君不暫忘開
襟春葉短分手夏條長獨有幽庭桂年年空自芳

送使廣州

張九齡

家在湘源住君今海嶠行經過正中道相送倍爲情心
逐書郵去形隨世網嬰因聲謝遠別緣義不緣名

嶺南送使

張說

秋鴈逢春返流人何日歸將余去國淚灑子入鄉衣饑
狄啼相聚愁猿喘更飛南中不可問書此示京畿

送丹陽採訪使

徐安貞

郡縣分南國皇華出聖朝爲憐鄉棹近不道使車遙舊
俗吳三讓遺風漢六條願言除疾苦天子聽謳謠

送崔員外黔中監選

綦母潛

持衡出帝畿星指夜郎飛神女雲迎馬荆門雨濕衣聽
猿收淚罷繫鴈待書稀蠻貊雖殊俗知君肝膽微

送張環攝御史監南選

孫逖

漢使得張綱威名懾遠方恩霑柱下史榮比選曹郎江
帶黔中闊山連峽水長莫愁炎暑地秋至有嚴霜

送沈校書吳中搜書

儲光羲

郊外亭臯遠野中岐路分苑門臨渭水山翠雜春雲秦
閣多遺典吳臺訪闕文君王思校理莫滯清江濱

送呂向補闕西岳勒碑

徐安貞

聖作西山頌君其出使年勒碑懸日月驅傳接雲煙寒

盡函關路春歸洛水邊別離能幾許朝暮玉墀前

前題

孫逖

刻石記天文朝推谷子雲篋中緘聖札巖下揖神君語
別梅初豔爲期草欲薰往來春不盡離思莫氛氲

送張翰林南海勒碑

杜甫

冠冕通南極文章落上台詔從三殿去碑到百蠻開野
館濃花發春帆細雨來不知滄海上天遣幾時迴

送許員外江外置常平倉

岑參

詔置海陵倉朝推畫省郎還家錦服貴出使繡衣香水
驛風催舫江樓月透牀仍懷陸氏橘歸獻老親嘗

送元中丞轉運江淮 一作錢起

王維

薄賦一作稅歸天府輕徭賴使臣歡霑賜帛老恩及卷綃
人去問珠官俗來經石蚌春東南卸亭上莫使有風塵

送任御史江南發糧賑河北百姓 張說

河朔人無歲荆南義廩開將興汎舟役必仗濟川才花

一作夜月臨江浦春雲歷楚臺調饑坐相望繡服幾時迴

送魏騎曹充宇文侍御判官分按山南

孫逖

雲雨陽臺路光華驛騎巡勸農開夢土恤隱惠荆人樓
迴吟黃鶴江長望白蘋觀風布明詔更是漢南春

送趙評事攝御史監軍嶺南

議獄持邦典臨戎假憲威風從閭闔去霜入洞庭飛篁
竹迎金鼓樓船引繡衣明年拜真月南斗使星歸

送著作佐郎崔融等從梁王東征

序曰古者涼風至白露下天子

命將帥訓甲練兵將以外威荒戎內輯中夏時
義遠矣自我大君受命百蠻蟻伏匈奴舍荒苟
之宮越裳重翡翠之貢虎符不發象教攸同寔
欲高議靈臺偃兵天下而林胡遺孽瀆亂邊
驅蚊蚋之師忽雷霆之伐乃竊海裔弄燕陲皇
帝哀北鄙之人罹其辛整以東正之義降彼偏
裨猶恐威令未孚亭塞仍梗于是謀元帥命佐
軍建梁國之旌旗吟漢庭之簫鼓東嚮而拜北
首長驅蜺旄羽騎之殷戈翻落日突髯蒙輪之
勇劍決浮雲方且獵火丸都窮蹄頓存肅慎
弔姑餘傍徨赤山巡御日域以昭
我王雙襲天討也云云

陳子昂

金天方肅殺白露始專征王師非樂戰之子慎佳兵海
氣侵南部邊風掃北平莫賣盧龍塞歸邀麟閣名

前題

杜審言

君王行出將書記遠從征祖帳連河闕軍麾動洛城旌
旃朝朔氣笳吹夜邊聲坐覺煙塵掃秋風古北平

送白利從金吾董將軍西征

李白

西羗延國討白起佐軍威劍決浮雲氣弓彎明月輝馬
行邊草綠旗一作旌卷曙霜飛抗手凜相顧寒風生鐵衣

送白少府送兵之隴右

高適

踐更登隴首遠別指臨洮爲問關山一作中事何如州縣

勞軍容隨赤羽樹色引青袍誰斷單于臂今年太白高

送李問政河北簡兵

張說

斗酒貽朋愛踟躕出御溝依然四牡別更想八龍遊密
親仕燕冀連年邇寇讐因君閱河朔垂淚語幽州

虢州送天平何丞入京市馬

岑參

關樹晚蒼蒼長安近夕陽回風醒別酒細雨濕行裝習
戰邊塵黑防秋塞草黃知君市駿馬不是學燕王

送李尚書入蜀

奉和聖製

張九齡

眷言感忠義何有間山川狗節今如此離情空復然皇
心在勤恤德澤委昭宣周月成功後明年或勞還

廣陵送宋員外佐越鄭舍人還京 韋述

朱紱臨秦望皇華赴洛橋文章南渡越書奏北歸朝樹
入江雲盡城銜海月遙秋風將客思川上晚蕭蕭

送王員外赴長沙

賈至

攜手登臨處巴陵天一隅春生雲夢澤水溢洞庭湖共
歎虞翻枉同悲阮籍途長沙舊卑濕今古不應殊

送游員外赴淮西

獨孤及

多君有奇略投筆佐元戎已佩郎官印兼乘御史驄使
星隨驛騎歸路有秋風莫道無書札他年懷袖空

水西館泛舟送王員外

單醪敢獻醉曲沼荷經過汎濫一作覽親魚鳥寅緣涉芰

荷劇談增惠愛美景借清和明日汀洲草依依柰別何

送張舍人之江東

李白

張翰江東去正值秋風時天清一作晴一鴈遠海闊孤帆

遲白日行欲暮滄波杳難期吳洲如見月千里幸相思

送朔方何侍郎

宋之問

聞道雲中使乘驄徃復還河兵守陽月塞虜失陰山拜
職嘗隨驃銘功不讓班旋聞受降日歌舞入蕭關

冬末送魏起居赴京

孫逖

大名將起魏良史更逢遷驛騎朝丹闕關亭望紫煙西

京春色近東觀物華偏早赴王正月揮毫記首年

送李司諫還京

得長字

岑參

別酒為誰香春官駁正郎醉經秦樹遠夢怯漢川長雨
過風頭黑雲開日脚黃知君解起草早去入文昌

送韋中丞之晉赴湖南

杜甫

寵渥徵黃漸權宜借寇頻湖南安背水峽內憶行春王
室仍多故蒼生倚大臣還將徐孺榻處處待高人

夏日楊長寧宅送崔侍御常正字入京

探韻得深字

醉酒楊雄宅升堂子賤琴不堪垂老鬢還對欲分襟天
地西江遠星辰北斗深烏臺俯麟閣長夏白頭吟

送裴侍御赴歲入京

得陽字

岑參

羨他驄馬郎元日謁明光立處聞天語朝回惹御香臺
寒柏樹綠江暖柳條黃惜別津亭暮揮戈憶魯陽

送杜侍御赴上都

一作張謂

孫逖

避馬臺中貴登車嶺外遙還因貢賦禮來謁大明朝地
入商山路鄉連渭水橋承恩返南越尊酒重相邀

送韋侍御赴上都

張謂

天朝辟書下風憲取才難更謁麒麟殿重簪獬豸冠月
明湘水夜霜重桂林寒別後頭堪白時時鏡裏看

送趙侍御歸上都

岑參

律詩 卷二十一 十三
驄馬五花毛青雲歸處高霜隨驅夏暑風逐振江濤執
簡皆推直勤王豈告勞帝城誰不戀回望動離騷

送裴侍御歸上都

張謂

楚地勞行役秦城罷鼓鼙舟移洞庭岸路出武陵谿江
月隨人影山花趁一作馬蹄離魂將別夢先已爾一作到

關西

送何侍御歸朝

杜甫

舟楫諸侯餞車輿使者歸山花相映發水鳥自孤飛春
日垂霜鬢天隅把繡衣故人從此去寥落寸心違

送韋侍御先歸京

得寬字

岑參

聞欲朝龍闕應須拂豸冠風霜隨馬去炎暑爲君寒客
淚題書落鄉愁對酒寬先憑報親友後月到長安

西亭送蔣侍御還京

得來字

忽聞驄馬至喜見故人來欲語多時別先愁計日回山
河宜晚眺雲霧待一作君開爲報烏臺客須憐白髮催

趙少尹南亭送鄭侍御歸東臺

得長字

紅亭酒甕香白面繡衣郎砌冷蟲喧座簾疎雨到牀鐘
催離興急絃逐醉歌長關樹應先落隨君滿路霜

送王尚一嚴疑二侍御赴司馬都督軍

張說

漢掖通沙塞邊兵護草腓將行司馬令助以鐵冠威白
露鷹初下黃塵騎欲飛明年春酒熟留酌二星歸

送李侍御赴安西

高適

行子對飛蓬金鞭指鐵驄功名萬里外心事一杯中虜
障燕支北秦城太白東離魂莫惆悵看取寶刀雄

送李侍御

宋之問

行李戀庭闈乘軺振綵衣南登指吳服北走出秦畿去
國夏雲斷還鄉秋鴈飛旋聞郡計入更有使臣歸

五言送李侍御聯句

吾友駐行輪遲遲惜上春

顏真卿

東西出餞路惆悵獨歸

人畫歡會期他日驅馳恨此身薦須知貢公望從此願
相因

送光祿姚卿還都

蘇頌

漢室有英台荀家寵俊一作多寵才九卿朝已入三子暮回
來不授綸為草還司鼎用梅兩京王者宅駟馬日應廻

送李卿曄

杜甫

王子思歸日長安已亂兵霑衣問行在走馬向承明暮
景巴蜀僻春風江漢清晉山雖自棄魏闕尚含情

送顏評事入京

岑參

顏子人歎屈宦遊今未遲佇聞明主用豈負青雲姿江

柳秋吐葉山花寒滿枝知君客一作窮愁處月滿一作出又作落

巴川時

暮春江夏送張祖監丞之東都序曰吁咄哉僕書

每思欲遐登蓬萊極目四海手弄白日頂摩青
穹揮斥幽憤不可得也而金骨未變玉顏已緇
何常不捫松傷心撫鶴歎息誤學書劍薄遊人
問紫微九重碧山萬里有才無命甘於後時劉
表不用於禰衡暫來江夏賀循喜逢於張翰只
樂船中達人張侯大雅君子統泛舟之役在清
川之湄談玄賦詩連與數月醉盡花柳賞窮江
山王命有程告以行邁煙景晚色慘為愁容繫
飛帆於半天泛淥水於遙海欲去不忍更聞芳
樽樂雖寰中趣逸天半平生酣暢未若此筵至
於清談浩歌雄筆麗藻笑飲醉酒醉揮素琴余
實不愧於古也揚袂遠別何時歸來想洛陽之
秋風將鱸魚以相待詩可贈遠無
乃闕乎

李白

欲別心不忍臨行情更親酒傾無限月客醉幾重春藉
草依流水攀花贈遠人送君從此去迴首泣迷津

登薊城西北樓送崔著作融入都序曰僕嘗倦遊

樓遠國街酒故人憤胡孽之侵邊從王師之出
塞元戎按甲方刈鮮甲之壘天子賜書且有君
相之召而崔侯佩劍即謁承明羣公負戎方絕
大漠燕山北望遼海東浮雲臺與碣館天殊亭
障共衣冠地隔撫劍何道長誦增歎以身許國
我則當仁論道匡君子思報主仲冬寒苦幽朔
初平蒼茫天兵之氣冥滅戎雲之色白羽一指
可掃九都赤墀九重佇觀獻凱
遂君之恩共有策勛飲至方同廊廟之歡偃武
橐弓借爾文儒之首薊丘故事可以贈言同賦
登薊樓送崔子云爾

陳子昂

薊樓望燕國負劍喜茲登清規子方奏單戟我無能仲

律詩 五言

卷二十七

十六

冬邊風急雲漢復霜稜慷慨竟何道西南恨失明

送王大校書

孟浩然

導漾自蟠冢東流為漢川維桑君有意解纜我開筵雲
雨從茲別林端意渺然尺書能不恡時望鯉魚傳

送東萊王學士無競

陳子昂

寶劍千金買平生未許人懷君萬里別持贈結交親孤
松宜晚歲衆木愛芳春已矣將何道無令白首一作髮新

送崔二長史日知赴潞州

張說

東山懷臥理南省悵悲翁共見前途促何知後會同莫
輕一筵宴明日半成空只一作况爾離亭闕思歸迷一作同迓

夢中

送楊長史赴果州

王維

袞斜不容憶之子去何之鳥道一千里猿聲十二時官
橋祭酒客山木女郎祠別後同明月君應聽子規

杭州送裴大澤赴廬州長史

李白

西江天柱遠東越海門深去割慈親戀行憂報國心好
風吹落日流水引長吟五月披裘者應知不取金

錢潞州陸長史再守汾州

蘇頲

河尹政成期為汾昔所推不榮三入地還美再臨時擁
傳雲初合聞鶯日正遲道傍一作人多出錢別有吏民思

送陳王府張長史還京

獨孤及

論齒弟兄列為邦前後差十年方一見此別復何嗟極
目故關道傷心南浦花少時相憶處招手望行車

大劍送劉右史

盧照隣

金碧禺山遠關梁蜀道難相逢屬晚歲相送動征鞍地
咽綿川冷雲凝劍閣寒倘過忠孝所為道憶長安

送袁使君任長江

李白

別離楊柳青樽酒表丹誠古道攜琴去深山見峽迎暖
風花繞樹秋雨草沿城自此長江內無因夜犬驚

同賀八送兗公赴荆

張說

疇昔同聲友鸞飛出鳳池風雲一蕩薄日月屢參差此
別黃葉下前期安可知誰憐楚南樹不為歲寒移

送任郎中出守明州

岑參

罷起郎官草初分刺史符城邊樓枕海郭裏樹侵湖郡
政傍連楚朝恩獨借吳觀濤秋正好莫不上姑蘇

潭州送韋員外牧韶州

杜甫

炎海韶州牧風流漢署郎分符先令望同舍有輝光白
首多年疾秋天昨夜涼洞庭無過鴈書疏莫相忘

送蘇八給事出牧徐州

用芳韻

盧僎

金鼎屬元方瓌闡連季常畏盈聊出守分命乃維良曉

律言 卷二十一 十八
騎辭朝遠春帆向楚長賢哉謙自牧天下詠餘芳

送賈閣老出汝州

杜甫

西掖梧桐樹空留一院陰艱難歸故里去住損春心宮
殿青門隔雲山紫邏深人生五馬貴莫受二毛侵

送江陵全少卿赴府任

獨孤及

豕司方春選劇縣得英髦固是攀雲漸何嗟趨府勞楚
山迎驛路漢水漲秋濤騫翥方茲始看君六翮高

衡州送李七勉赴廣州

杜甫

斧鉞下青冥樓船過洞庭北風隨爽氣南斗避文星日
月籠中鳥乾坤水上萍王孫丈人行垂老見飄零

錢唐州高使君赴任

韋元旦

桐柏膺新命芝蘭惜舊遊鳴臯夜鶴在遷木早鶯求傳
擁淮源路罇空灞水流落花紛近一作送遠春色引離憂

前題

沈佺期

弱冠相知早中年不見多生涯在王事容鬢各蹉跎良
守初分岳嘉聲卽潤河還從漢闕下傾耳聽中和

前題

盧藏用

錢酒臨豐樹褰帷出魯陽蕙蘭春已晚桐栢路猶長祖
逖方城鎮安期外氏鄉從來二千石天子命唯良

前題

徐彥伯

香萼媚紅滋垂條縈綠絲情人拂瑤袂共惜此芳時
驢已躑躅鳥隼方歲蕤跂予望太守流潤及京師

前題

岑羲

蒼茫南塞地明媚上春時日極傷千里懷君不自持
征車別岐路斜日下崦嵫一歎輶軒阻悠悠卽所思

前題

李义

淮源之水清可以濯君一作我纓彼美稱才傑親人佇政
聲歲寒疇曩意春晚別離情終歎臨岐遠行看擁傳榮

前題

馬懷素

外牧資賢守斯人奉帝俞淮南膺一作應建隼渭北暫分

符坐歎煙波隔行嗟物候殊何年昇美課廻看一作北
城隅

鳳翔府行軍送程使君赴成州

岑參

程侯新出守好日發行軍拜命時人羨能官聖主聞江
樓黑塞雨山郭冷秋雲竹馬諸童子朝朝待使君

送泉州李使君之任

張循之

徬海皆荒服分符重漢臣雲山百越路市井十洲人執
玉來朝遠還珠人貢頻連年不見雪到處卽行春

送梓州李使君

王維

萬壑樹參天千山響杜鵑山中一夜雨樹杪百重泉漢

律言 卷二十七 二十
女輸槿布巴人訟芋田文翁翻教授不敢倚先賢

送長沙陳太守

二首

李白

長沙陳太守逸氣凌青松英王賜五馬本是天池龍湘
水迴九曲衡山望五峰榮君按節去不及遠相從
七郡長沙國南連湘水濱吳一作定王垂舞袖地窄不迴
身莫小二千石當安遠俗人洞庭鄉路遠遙羨錦衣春

送封太守

王維

忽解羊頭削聊馳熊首轡揚舲發夏口按節向吳門帆
映丹陽郭楓攢一作藏赤岸村百城多候吏露冕一何尊

送高唐州

張說

常時好閒獨一作燕朋舊少相過及爾宣風去方嗟別日
多淮流春晚晚汝海路蹉跎百歲屢分散歡言復幾何

送邢桂州

王維

鏡吹喧京口風波下洞庭赭圻將赤岸擊汰復揚舲日
落江湖白潮來天地青明珠歸合浦應逐使臣星

送馬鄭州

獨孤及

使君朱兩轡春日整東轅芳草成臯路青山涼水源勉
修循吏跡以謝主人恩當使仁風動遙聽輿頌誼

送鮮于萬州遷巴州

杜甫

京兆先時傑琳琅照一門朝廷偏注意接近與名藩祖

帳維舟數寒江觸石喧看君妙爲政他日有殊恩

江亭王閬州筵餞蕭遂州

離亭非舊國春色是他鄉老畏歌聲斷一作短愁從舞曲

長二天開寵餞五馬爛生一作輝光川路風煙接俱宜下

鳳凰

送蘇郎中縮出佐荊州

孫逖

神仙久留滯清切佇飛翻忽佐南方牧何時西掖垣高
車自蘭省便道出荊門不見河梁別空銷郢路魂

送大理正攝御史判涼州別駕

苑咸

天子念西一作邊疆咨君去不遑垂銀棘庭印持斧柏臺

網雪下天山白泉枯塞草黃佇聞河隴外還繼海沂康

送懷州吳別駕

岑參

灞上柳枝黃壚頭酒正香春流飲去馬暮雨濕行裝驛
路通函谷州城接太行覃懷人總喜別駕得王祥

送襄州任別駕

別乘向襄州蕭條楚地秋江聲官舍裏山色郡城頭莫
羨黃公蓋須乘彥伯舟高陽諸醉客唯見古時丘

江亭送眉州辛別駕昇之

得蕪字

杜甫

柳影含雲幕江波近酒壺異方驚會面終宴惜征途沙
暖一作遠低風蝶天晴喜浴鳧別離傷老大意緒日荒蕪

送李著作倅杭州

張諤

輟史空三署題輿佐一方
祖筵開霽景征陌值韶光
水陸風煙隔秦吳道路長
佇聞敷善一作雅政邦國詠惟康

送鄭州周司功

楊炯

漢國臨清渭京城枕濁河
居人下一作泣珠淚賓御促驪
歌望極關山遠秋深煙霧多
唯餘三五夕明月暫經過

送梓州周司功

御溝一相送征馬屢盤桓
言笑方無日離憂獨未寬
舉杯聊勸酒破涕暫為歡
別後風清夜思君蜀路難

淇上送韋司倉往滑臺

高適

飲酒莫辭醉醉多適不愁
孰知非遠別終念對窮秋
滑臺門外見淇水眼前流
君去應回首風波滿渡頭

餞韋兵曹

王勃

征驂臨野次別袂慘江垂
川霽浮煙斂山明落照移
鷹風凋晚葉蟬露泣一作泣
秋枝亭臯分遠望延想間雲涯

餞唐郎中洛陽令

沈佺期

一臺推往妙三史佇來修
應宰鳧還集辭郎雉少留
郊筵乘落景亭傳理殘秋
願以絃歌暇芝蘭想舊遊

送王峻自羽林赴永昌令

張說

將星移北洛神雨避東京
為負剛腸譽還追彊項名
白

雲向伊闕黃葉散昆明多謝絃歌宰稀聞桴鼓聲

送梁李二明府

陳子昂

負書猶在漢懷策未聞秦復此窮秋日芳樽別故人黃
金裝屢盡白首契逾新空羨雙鳧鳥俱飛向玉輪

送武進鄭明府

宋之問

絃歌試宰日城闕賞心違北謝蒼龍去南隨黃鵠飛夏
雲海中出吳山江上微曠歌一作謠豈云遠從此慶緇衣

送方城韋明府

王維

遙思葭菼際寥落楚人行高鳥長淮水平蕪故郢城使
車聽雉乳縣鼓應雞鳴若見州從事無嫌手板迎

送義烏韋明府

獨孤及

妙年能致身陳力復安親不憚關山遠寧辭簿領勤過
江雲滿路到縣海為鄰每歎違心賞吳門正早春

送趙十七明府之縣

杜甫

連城為寶重茂宰得才新山雉迎舟楫江花報邑人論
交翻恨晚臥病却愁春惠愛南翁悅餘波及老身

送宇文舍人出宰元城

得陽字

岑參

雙鳧出未央千里過河陽馬帶新行色衣聞舊御香縣
花迎墨綬關柳拂銅章別後能為政相思淇水長

送張昇卿宰新淦

官柳葉尚小長安春未濃送君潯陽宰把酒青門鐘水
驛楚雲冷山城江樹重遙知南湖上祇對香爐峰

崔駙馬山池送宇文明府

得苗字

竹裏過紅橋花間藉綠苗池涼醒別酒山翠拂行鑣鳳
去妝樓閉鳧飛葉縣遙不逢秦女在何處聽吹簫

同王僕射山亭餞岑廣武義

得言字

張說

聞道長岑令奮翼宰旅門長安東陌上送客滿朱軒琴
爵留佳境山池借好園茲遊恨不見別後綴離言

送姚崑客任會稽何塞任孟縣

儲光義

越城臨渤解晉國在河汾仙綬兩鄉意青郊一路分野

寒春未發田雀

一作鶴

暮成羣他日思吳會嘗因西北雲

送永昌蕭贊府

宋之問

柳變曲江頭送君函谷遊弄琴寬別意酌醴醉春愁戀
本亦何極贈言微所求莫令金谷水不入故園流

送崔贊府赴南陽

楊衡

聞君動征棹犯夜故來尋強置一樽酒重欵百年心燈
白霜氣冷室虛松韻深南陽三顧地幸偶價千金

杜少府之任蜀州

王勃

城闕輔三秦風煙望五津與君離別意同是宦遊人海
內存知已天涯若比隣無爲在岐路兒女共霑巾

送楚丘翹少府赴官

岑參

青袍美少年黃綬一神仙
微子城東面梁王苑北邊
桃花似馬榆莢小於錢
單父聞相近家書早爲傳

送鄭少府赴滏陽

子真河朔尉邑里帶清漳
春草迎袍色晴花拂綬香
青山入官舍黃鳥度宮牆
若到銅臺上應憐魏寢荒

送臨津房少府

楊炯

岐路三秋別江津萬里長
煙霞駐征蓋弦奏促飛觴
階樹含斜日池風泛早涼
贈言未終竟流涕忽霑裳

送豐城王少府

愁結亂如麻長天照落霞
離亭隱喬樹溝水浸平沙
左尉才何屈東關望漸賒
行看轉牛斗持此報張華

送韋城李少府

張九齡

送客南昌尉離亭西候春
野花看欲盡林鳥聽猶新
別酒青門路歸軒白馬津
相知無遠近萬里尚爲鄰

送宛句趙少府

解巾行作吏樽酒謝離居
修竹含清景華池澹碧虛
地將幽興愜人與舊遊
踈林下紛相送多逢長者車

送江陵黎少府

岑參

悔繫腰間綬翻爲膝下愁
那堪漢水遠更值楚山秋
新

橘香官舍征帆拂縣樓王程不敢住豈是愛荊州

夏初醴泉南樓送太康顏少府

何地堪相餞南樓出萬家可憐高處送遠見故人車野
果新成子庭槐欲作花愛君兄弟好書向潁中誇

送劉少府遊越州

駱賓王

一丘余枕石三越爾懷鉛離亭分鶴蓋別岸指龍川背

夏一作蟬聲斷來寒鴈影連如何溝水上悽斷聽

離弦

送顏少府投鄭陳州

岑參

一尉便垂白數年唯草玄出關策匹馬逆旅聞秋暹

客多酒債罷官無俸錢知君羈思少所適主人賢

送郭少府

探得憂字

駱賓王

開筵枕

一作抗

德水輟棹艤仙舟貝闕桃花浪龍門竹箭

流當歌悽別曲對酒泣離憂還望青門外空見白雲浮

送麴十少府

李白

試發清秋興因為吳會吟碧雲斂海色流水折江心我
有延陵劍君無陸賈金艱難此為別惆悵一何深

送裴少府

張萬頃

夕膳望

一作思

東周晨裝不少留酒中同樂事關外起離

憂座濕秦山雨庭寒渭水秋何當鷹隼擊來拂故林遊

白下驛錢唐少府

王勃

下驛窮交日昌亭旅食年相知何用早懷抱卽依然浦樓低晚照鄉路隔風煙去去如何道長安在日邊

送秘省虞校書赴虞鄉丞

岑參

花綬傷腰新關東縣欲春殘書厭科斗舊閣別麒麟虞坂臨官舍條山映吏人看君有知己坦腹向平津

送賈昇主簿之荆府

孟浩然

奉使推能者勤王不暫閒觀風隨按察乘騎度荆關送別登何處開筵舊峴山征軒明日遠空望郢門間

送崔主簿赴滄州

李嶠

紫陌追隨日青門相見時宦遊從此去離別幾年芳桂中樽酒幽蘭下調詞他鄉有明月千里照相恩

送蘇主簿赴偃師

張九齡

我與文雄別胡然邑吏歸賢人安下位鷲鳥欲卑飛激節輕華冕移官狗綵衣羨君行樂處從此拜庭闈

送崔主簿赴夏陽

岑參

常愛夏陽縣往年曾再過縣中饒白鳥郭外是黃河地近行程少家貧酒債多知君新稱意好得柰春何

送楊翟張主簿之任

獨孤及

舊聞陽翟縣西接鳳高山作吏同仙隱知君處劇閒少

年當効用遠道豈辭艱遲子揚名後方期綵服還

送盧主簿

王勃

窮途非所恨虛室自相依城闕居年滿琴樽俗事稀開襟方未已分袂忽多違東巖富松竹歲暮幸同歸

送袁太祝尉豫章

孟浩然

何幸遇休明觀光來上京相逢武陵客獨送豫章行隨牒牽黃綬離羣會墨卿江南佳麗地山水舊難名

送張卿郎君赴碭石尉

岑參

卿家送愛子愁見灞頭春草羨青袍色花隨黃綬新縣西函谷路城北大陽津日暮征鞍去東郊一片塵

送李郎尉武康

潘郎腰綬新雪上縣花春山色低官舍湖光映吏人
不須嫌邑小莫卽恥家貧更作東征賦知君有老親

送張子尉南海

不擇南州尉高堂有老親樓臺重蜃氣邑里雜鮫人
海暗三山雨花明五嶺春此鄉多寶玉慎莫厭清貧

送裴二虯作尉永嘉

杜甫

孤嶼亭何處天涯水氣中故人官就此絕境與誰同
隱吏逢梅福遊山憶謝公扁舟吾已就把釣待秋風

送人尉閩中

李頎

可歎芳菲日分爲萬里情閨門折垂柳御苑聽殘鶯海
戍通閩邑江航過楚城客心君莫問春草是王程

送友人尉蜀中

徐晶

故友漢中尉請爲西蜀吟人家多種橘風土愛彈琴水
向昆明濶山連一作通大夏深理閒無別事時寄一登臨

送柳錄事赴梁州

岑參

英掾柳家郎離亭酒甕香折腰思漢北隨傳過巴陽江
樹連官舍山雲到臥牀知君歸夢積去去劍川長

送王七錄事赴虢州

早歲卽州知嗟君最後時青雲仍未達白髮欲成絲小

店關門樹長河華岳祠弘農人吏待莫使馬行遲

送虢州王錄事之任

獨孤及

謂子文章達當年羽翼高一經俄白首三命尚青袍未
遇須藏器安卑莫告勞盤根儻相值試用發硎刀

送謝錄事之越

孟浩然

清旦江天迴涼風西北吹白雲向吳會征帆亦相隨想
到耶谿日應探禹穴奇仙書倘相示予在此一作北山陲

送王錄事卻歸華陰

錄事自華陰尉授虢州錄事
參軍旬日却復舊官

岑參

相送欲狂歌其如此別何攀轅人共惜解印日無多仙

掌雲重見關門路再過雙魚莫不寄縣外是黃河

東津送韋諷攝閬州錄事

杜甫

聞說江山好憐君吏隱兼寵行舟遠泛惜別酒頻添推
薦非承乏操持必去嫌他時如按縣不得慢陶潛

送吳宣從事

孟浩然

才有幕中士

一作寧而

無塞上勳漢兵將滅虜王粲

始從軍旌旆邊庭去山川地脉分平生一七首感激贈
夫君

送楊府李功曹

張九齡

平生屬良友結綬望光輝何知人事拙相與宦情非別

路穿林盡征帆際海歸居然已多意况復兩鄉違

送崔功曹赴越

高適

傳有東南別題詩報客居江山知不厭州縣復何如莫
恨吳歛曲嘗一作當看越絕書今朝欲乘興隨爾食鱸魚

送段功曹之廣州

杜甫

南海春天外功曹幾月程峽雲籠樹小湖日蕩船一作落江
明交趾丹砂重韶州白葛輕幸君因估一作旅客時寄錦

官城

送蜀郡李掾

岑參

飲酒俱未醉一言聊贈君功曹善為政明主還應聞夜

宿劍門月朝行巴水雲江城菊一作橘花發滿道香氣氤

錢張七琚任宗城同產八人俱以才名知儲光羲

他日曾遊魏魏家餘趾存可憐宮殿所但見桑榆繁此去拜新職為榮近故園高陽八才子况復在君門

送陸協律赴端州一作南州有贈賈至

越井人南去湘川水北流江邊數杯酒海內外一作一孤舟嶺嶠同仙客京華即舊遊春心將別恨萬里共悠悠

送羽林長孫將軍赴歙州岑參

剖竹向江濱能名計日聞隼旗新刺史虎劍舊將軍驛舫宿湖月州城浸海雲青門酒樓上欲別醉醺醺

送長孫將軍拜歙州之任 獨孤及

臨難敢橫行遭時取盛名五兵常典校四十又專城浪逐樓船破風從虎竹生島夷今可料繫頸有長纓

送田四弟將軍將夔州柏中丞命起居江陵節度

陽城郡王衛公墓一作夔府送田將軍歸江陵杜甫

離筵罷多酒起地發寒塘回首中丞座馳箋異姓王燕辭楓樹日鴈度麥城霜空醉山翁酒遙憐似葛疆

送裴別將之安西 高適

絕域眇難躋悠然信馬蹄風塵驚一作經跋涉搖落怨睽攜地出流沙外天長甲子西少年無不可行矣莫悽悽

幸望春宮送朔方軍大總管張仁亶

奉和聖製

李適

地限驕南牧天臨餞北征解衣延寵命橫劍總威名豹
略恭宸旨雄文動睿情坐觀膜拜入朝夕受降城

前題

鄭愔

御蹕下都門軍麾出塞垣長楊誇武騎細柳接戎軒睿
曲風雲動邊威鼓吹喧坐帷將闔外俱是報明恩

送李太保兼御史大夫充渭北節度使

岑參

詔出未央宮登壇近總戎上公周太保副一作相漢司

空弓拔箭西月旗翻渭北風弟兄皆許國天地荷成功

送卿三翁統節度鎮軍還江陵

杜甫

火旗還錦纜白馬出江城嘹唳鳴一作笳發蕭條別浦

清寒空巫峽曙落日渭陽情一作留滯嗟衰疾何時見

息兵

送趙都督赴代州

得青字

王維

天官動將星漢上柳條青萬里鳴刁斗三軍出井陘志
身辭鳳闕報國取龍庭豈學書生輩牕間老一經

廣州蕭都督入朝過岳州宴餞

得冬字張說

孤城抱大壘節使往朝宗果是臺中舊依然水上逢京

華遙比日疲老颯如冬竊羨能言鳥銜恩向九重

送單于裴都護赴西河

崔顥

征馬出翩翩城秋月正圓單于莫近塞都護欲臨邊漢
驛通煙火胡沙泛一作井泉功成須獻捷未必去經年

送李大都護

常建

單于雖不戰都護事邊深君執幕中祕能爲高士心海
頭近初月磧裏多愁陰西望郭猶子將分淚滿襟

送夏侯參軍赴廣州

賈至

聞道衡陽外由來鴈不飛送君從此去書信定應稀雲
海南溟遠煙波北渚微勉哉孫楚吏綵服正光輝

送越州裴參軍入京

孫逖

日落川徑寒離心苦未安客愁西向盡鄉夢北歸難霜
果林中變秋花水上殘明朝渡江後雲物向南看

送梓州高參軍還京

盧照隣

京洛風塵遠袞斜煙霧深北遊君似智南飛我異禽別
路琴聲斷秋山猿鳥吟一乖青巖酌空佇白雲心

送京兆韋參軍量移東陽

李白

聞說金華渡東連五百灘全勝若耶好莫道此行難猿
嘯千谿合松風五月寒他年一攜手搖艇入新安

送竇參軍

李頎

城南送歸客舉酒對林巒暄鳥迎風轉春衣度兩寒桃
花開翠幕柳色拂金鞍公子何時至無令芳草闌

送宇文三赴河西充行軍司馬 王維

橫吹雜繁笳邊風捲塞沙還聞田司馬更逐李輕車蒲
類成秦地莎車屬漢家當令犬戎國朝聘學昆邪

錢張郎中除義王府司馬 同盧明府 孟浩然

上國星山一作河列一作賢王甲一作第開故人分職去

潘令寵行來冠蓋趨梁苑江山一作失楚材豫愁軒騎

動賓客散池臺

錢許州宋司馬赴任 徐堅

舊許星車轉神京祖帳開斷煙傷別望零雨送離杯
燕依空遶賓鴻入聽哀分襟一作與秋氣日夕共悲哉

前題 薛稷

令弟與名兄高才振兩京別序聞鴻鴈離章動鶴鴒遠
朋馳一作翰墨勝地寫丹青風月相思夜勞望潁川星

前題 盧藏用

國為休徵選輿因仲舉題山川襄野隔朋酒灞亭睽零
雨征軒驚秋風別驥嘶驅歌一曲罷愁望正淒淒

前題 宋之問

潁郡水東流荀陳兄弟遊偏傷茲日遠獨向聚星州河

潤在明德人康非外求當聞力爲政遙慰我心愁

前題

李义

展驥旌時傑談雞美代賢暫離仙掖務追送近郊筵地
慘金商節人康璧假田從來昆友事咸以佩刀傳

錢湖州薛司馬

宋之問

別駕促嚴程離筵多故情交深季作友義重伯爲兄鎮
靜移吳俗風流在漢京會看陳仲舉從此拜公卿

錢荊州崔司馬

蘇頌

茂禮雕龍昔香名展驥初水連南海漲星拱北辰居稍
發仙人履將題別駕輿明年徵拜入荆玉不藏諸

送趙司馬赴蜀州

宋之問

餞子西南望煙綿劍道微橋寒金鴈落林曙碧雞飛職
拜輿方遠仙成履會歸定知和氏璧遙掩玉輪輝

送揚州王司馬

岑參

君家舊淮水水上到揚州海樹青官舍江雲黑郡樓東
南隨去鳥人吏待行一作歸舟爲報吾兄道如今已白頭

巴西聞收京闕送班司馬入京

杜甫

聞道收京廟鳴鑿自陝歸傾都看黃屋正殿引朱衣劍
外春天遠巴西敕使一作賜稀念君經世亂匹馬向王畿

送司馬入京

群盜至今日先朝忝從臣
歎君能戀主久客羨歸秦
黃閣長司諫丹墀有故人
向來論社稷爲話涕霑巾

錢王司馬入計

同用洲字

張九齡

元寮行上計舉錢出林丘
忽望題輿遠空思解榻遊別
筵鋪柳岸征棹倚蘆洲
獨歎湘江水朝宗向北流

東湖臨泛錢王司馬

南土秋雖半東湖草未黃
聊乘風日好來汎芰荷香
蘭棹無勞速菱歌不厭長
忽懷京洛去難與共清光

送李功曹之荊州充鄭侍御判官

杜甫

曾聞宋玉宅每欲到荊州
此地生涯晚遙通一作水國

悲

秋孤城一柱觀落日九江流
使者雖光彩青楓遠自愁

送李補闕攝御史充河西判官

孫逖

昔年叨補袞邊地亦埋輪
官序慙先達才名畏後人
西戎雖獻欵上策恥和親
早赴前軍幕長清外域塵

送張判官赴河西

王維

單車曾出塞報國敢邀勳
見逐張征虜今思霍冠軍
沙平連白雪蓬卷入黃雲
慷慨倚長劍高歌一送君

送李判官赴江東

聞道皇華使方隨阜蓋臣
封章通左語冠冕化文身
樹色分楊子潮聲滿富春
遙知辨壁吏恩到泣珠人

送周判官往台州

孫逖

吾宗長作賦登陸訪天台星使行看入雲仙意轉催飲
水攀璀璨驅傳歷莓苔日暮東郊別真情去不廻

送平判官入秦

一作盧象

綦毋潛

謫遠自安命三年已忘歸同聲

一作願執手驛騎到門

扉云是帝鄉去軍書謁紫微曾為金馬客向日淚沾衣

送廣州周判官

張九齡

海郡雄蠻落津亭壯越臺城隅百雉映水曲萬家開里
樹桄榔出時禽翡翠來觀風猶未盡早晚使車廻

送靈州李判官

杜甫

羯胡腥四海回首一茫茫血戰乾坤赤氛迷日月黃將
軍專策略幕府盛才良近賀中興主神兵動朔方

陝州月城樓送辛判官入秦

岑參

送客飛鳥外城頭樓最高樽前遇風雨牕裏動波濤謁
帝向金殿隨身唯寶刀相思灞陵月祇有夢偏勞

磧西頭送李判官入京

一身從遠使萬里向安西漢月垂鄉淚胡沙費

一作馬

蹄尋河愁地盡過磧覺天低送子軍中飲家書醉裏題
送裴判官自賊中再歸河陽幕府

東郊未解圍忠義似君稀誤落胡塵裏能持漢節歸卷

簾山對酒上馬雪沾衣却向嫖姚幕翩翩去若飛

送獨孤判官

高適

錢君嗟遠別為客念周旋征路今如此前軍猶眇然出
關逢漢壁登隴望胡天亦是封侯地期君早着鞭

送王判官

徐安貞

明月開三峽花源出五谿城池青壁裏煙火綠林西不
畏王程促唯愁仙路迷巴東下歸棹莫待夜猿啼

送平澹然判官

王維

不識陽關路新從定遠侯黃雲斷春色畫角起邊愁瀚
海經年到交河出塞流須令外國使知飲月氏頭

送董判官

高適

逢君說行邁倚劍別交親幕府為才子將軍作主人近
關多雨雪出塞有風塵長策須當用男兒莫顧身

送馮判官

碣石遼西地漁陽薊北天關山唯一道雨雪盡三邊才

子方為客將軍正渴慕一作賢遙知幕府下書記日翩翩

送王十六判官

杜甫

客下荆南盡君今復入舟買薪猶白帝鳴櫓少一作沙
頭衡霍生春早瀟湘共海浮荒林庾信宅為仗主人留

郾城西原送李判官兄武判官弟赴成都府

律言 卷二十一 三十一
憑高送所親久坐惜芳辰遠水非無浪他山自有春野
花隨處發官柳著行新天際傷愁別離筵何太頻

送劉司直赴安西幕府

王維

絕域陽關道胡沙與塞塵三春時有鴈萬里少行人昔
籍隨天馬葡萄逐漢臣當令外國懼不敢覓和親

送韋書記赴安西

杜甫

夫子歛通貴雲泥相望懸白頭無藉在朱紱有哀憐書
記赴三捷公車留五年欲浮江海去此別意茫然

送薛植入京

張說

青組言從史鴻都忽見求欵言人向老飲別歲方秋髩

髩長安陌平生是舊遊何時復相遇宛在水中流

送相里造入京

李頎

子月過秦正寒雲覆洛城嗟君未得志猶作苦辛行煖
酒嫌衣薄瞻風候雨晴春官含笑待驅馬速前程

送錢子入京

夜夢還京北鄉心恨擣衣朝逢入秦使走馬喚君歸驛
路清霜下關門黃葉稀還家應信宿看子速如飛

送潘三入京

周瑒

故人嗟此別相送出煙堦柳色分官路荷香入水亭離
歌未盡曲酌酒共忘形把手河橋上孤山日暮青

秋日送尹大赴京

序曰尹大官三冬業暢指蘭臺而拾青薛六郎四海情深飛桂

樽而舉白于時兔苑東上龍火西流劍彩沈波碎楚蓮於秋水金輝照岸秀陶菊於寒堤既切送歸之情彌軫窮途之感重以清江帶地聞吳會於星津白雲在天望長安於日路人之情也能不悲乎雖道術相望叶神交於靈府而風煙懸隔貴申心於翰林請振詞鋒同開筆海人為四韻用慰九秋

駱賓王

掛瓢余隱舜負鼎爾干湯竹葉離樽滿桃花別路長
河耿秋色落月抱寒光素書如可嗣幽谷竚賓行

涪江泛舟送韋班歸京

得山字

杜甫

追餞同舟日傷春一水間飄零為客久衰老羨君還花

雜一作遠

重重樹雲輕處處山天涯故人少更憶一作益鬢

毛斑

送殷大入蜀

陳子昂

禹一作蜀山金碧路此地饒英靈送君一為別悽斷故鄉

情片雲生極浦斜日隱離亭坐看征騎沒唯見遠山青

送友人入蜀

李白

見說蠶叢路崎嶇不易行山從人面起雲傍馬頭生芳

樹籠秦棧春流遶蜀城升沈應已定不必訪一作問君平

醴泉東谿送程皓元鏡微入蜀

得寒字岑參

蜀郡路漫漫梁州過七盤二人來信宿一縣醉衣冠谿

逼春衫冷林交宴席寒西南如噴酒遙向雨中看

行言
卷二十一
公安送李二十九弟晉肅入蜀
時余下沔鄂

杜甫

正解柴桑纜仍看蜀道行
檣烏相背發塞鴈一行鳴南
紀連銅柱西江接錦城
憑將百錢卜飄泊問君平

送友人之新豐

劉希夷

日暮秋風起關山斷別情
淚隨黃葉下愁向綠樽生
野路歸驂轉河洲宿鳥驚
賓遊寬旅宴王事促嚴程

送張祥之房陵

孟浩然

我家南渡頭一作隱慣習野人舟
日夕弄清淺林湍逆上
流山河一作鄢陵據形勝
天地生豪酋君意在利往一作涉知

音期自投

送蔡十二之海上

高適

黯然而所爲相對但一作益悲酸
季弟念離別賢兄救急
難河流冰處盡海路雪中寒
尚有南飛鴈知君不忍看

送蹇秀才赴臨洮

悵望日千里如何今二毛
猶思陽谷去莫厭隴山高
倚馬見雄筆隨身唯寶刀
料君終自致勲業在臨洮

送裴五赴東川

杜甫

故人亦流落高義動乾坤
何日通燕塞相看老蜀門
東行應暫別北望若銷魂
凜凜悲秋意非君誰與論

送舍弟穎赴齊州 三首

岷嶺南蠻北徐關東海西此行何日到送汝萬行啼絕
域惟高枕清風獨杖藜危時暫相見衰白意都迷
風塵暗不開汝去幾時來兄弟分離苦形容老病催江
通一柱觀日落望鄉臺客意長東北齊州安在哉
諸姑今海畔兩弟亦山東去傷干戈覓來看道路通短
衣防戰地匹馬逐秋風莫作俱流落長瞻碣石鴻

送丘爲往唐州

王維

宛洛有風塵君行多苦辛四愁連漢水百口寄隨人槐
色陰清晝楊花惹暮春朝端肯相送天子繡衣臣

送元二適江左

杜甫

亂後今相見秋深復遠行風塵爲客日江海送君情晉
室丹陽尹公孫白帝城經過自愛惜取次莫論兵
都下送辛大之鄂 孟浩然

南國辛居士言歸舊竹林未逢調鼎用徒有濟川心予
亦忘機者田園在漢陰因君故鄉去遙寄式微吟

送人到安西

岑參

上馬帶胡鉤翩翩度隴頭小來思報國不是愛封侯萬
里鄉爲夢三邊月作愁早須清黠虜無事莫經秋

奉送十七舅下邵桂

杜甫

絕域三冬暮浮生一病身感深辭舅氏別後見何人縹
緲蒼梧帝推遷孟母鄰昏昏阻雲水側望苦傷神

送崔都水翁下峽

無數涪江筏鳴橈總發時別離終不久宗族恐相遺白
狗黃牛峽朝雲暮雨祠所過頻問訊到日自題詩

送蘇倩遊天台

張子容

靈異尋滄海笙歌訪翠微水鷗迎共一作近狎雲鶴待將
飛琪樹嘗仙果瓊樓試羽衣遙知神女問獨恠阮郎歸

送崔九與宗遊蜀

王維

送君從此去轉覺故人稀徒御猶迴首田園方掩扉出

門當旅食中路授寒衣江漢風流地遊人何歲歸

送人尋裴斐

儲光羲

柱史迴清憲謫居臨漢川遲君千里駕方外賞雲泉路
斷因春水山深由暝煙湘江見遊女寄摘一枝蓮

送二十二兄北遊尋羅中

岑參

斗柄欲東指吾兄方北遊無媒謁明主失計干諸侯夜
雪入穿履朝霜凝敝裘遙知客舍飲醉裏聞春鳩

送袁十嶺南尋弟

孟浩然

早聞牛渚詠今見鶴鴒心羽翼嗟零落悲鳴別故林蒼
梧白雲遠空一作煙水洞庭深萬里獨飛去南風遲爾音

律言 卷二十一 送孔周之南海謁王尚書

楊衡

泛棹送流萍桂寒山更青望雲生碧漢看日下滄溟潮
盡收珠母沙開拾翠翎自趨龍戟下再爲頌芳馨

送沈芳謁李觀察求仕進

周萬

往日長安路歡遊不惜年爲貪盧女曲用盡沈郎錢身
老方投刺途窮始着鞭猶聞有知己此去不徒然

送王伯倫應制授正字歸

岑參

當年最稱意數子不如君戰勝時偏許名高人共一作
聞半天城北雨斜日灞西雲科斗皆成字無令錯古文

送孟十二倉曹赴東京選

杜甫

君行別老親此去苦家貧藻鏡留連客江山憔悴人秋
風楚竹冷夜雪鞏梅春朝夕高堂念應宜綵服新

陪使君早春西亭送王贊府赴選 岑參

西亭繫五馬爲送故人歸客舍草新出關門花欲飛到
來逢歲酒却去換春衣吏部應相待如君才調稀

餞李秀才赴舉

劉希夷

鴻鵠振羽翩翩飛入帝鄉朝鳴集銀樹暝宿下金塘日
月天門近風煙夜路長自憐窮浦鴈歲歲不隨陽

送張子容進士舉

孟浩然

夕曛山照滅送客出柴門惆悵野中別殷勤岐路一作
醉後

言茂林子偃息喬木爾飛翻無使谷風誚須令友道存

送洗然弟進士舉

獻策金門去承歡綵服違以吾一日長念爾聚星稀昏
定須温席寒多未授衣桂枝如已擢早逐鴈南飛

同吳王送杜秀芝舉入京

李白

秀才何翩翩王許回也賢暫別廬江守將遊京兆天秋
山宜落日秀木出寒煙欲折一枝桂還來鴈沼前

送薛彥偉擢第東歸

岑參

時輩似君稀青春戰勝歸名登郗詵第身着老萊衣稱
意人皆羨還家馬若飛一枝誰不折棣萼獨相輝

送嚴訖擢第歸蜀

巴江秋月新閣道發征輪戰勝真才子名高動世人工
文能似舅擢第去榮親十月天官待應須早赴秦

送蒲秀才擢第歸蜀


去馬疾如飛看君戰勝歸新登郗詵第更着老萊衣漢
水行人少巴山客舍稀向南風候暖臘月見春輝

送虞秀才擢第歸長沙

獨孤及

充賦名今遂安親事不違甲科文比玉歸路錦為衣海
運同鷗化風帆若鳥飛知君到三逕松菊有光輝

送賈起居奉使入洛取圖書因便拜觀



蘇頲

舊國才因地當朝史命官遺文徵闕簡還思采芳蘭傳
發關門候觴稱邑里歡早持京副入旋佇洛書刊

送樊侍御史丹陽便覲

岑參

臥病窮巷晚忽驚驄馬來知君京口去借問幾時回驛
舫江風引鄉書海鴈催慈親應倍喜愛子在霜臺

送張郎中赴隴右覲省卿公

時張卿公充節度留後

中郎鳳一毛世上獨賢豪弱冠已銀印出身唯寶刀還
家卿月迴度隴將星高幕下多相識邊書醉嬾操

送常侍舒公歸覲

蘇頲

朝聞講藝餘晨省拜恩初訓胄尊庠序榮親耀里閭朱
丹華轂送斑白綺筵舒江上春流滿還應薦躍魚

送李給事歸徐州覲省

孫逖

列位登青瑣還鄉復綵衣共言晨省日便是晝遊歸春
水經梁宋晴山入海沂莫愁東路遠四牡正駢駢


送弘文李校書往漢南拜親

岑參

未識已先聞清辭果出羣如逢禰處士似見鮑參軍夢
暗巴山雨家連漢水雲慈親思愛子幾度泣霑裙

送裴校書從大夫淄川覲省

尚書東出守愛子向青州一路通關樹孤城近海樓懷



中江橘熟倚處戟門秋更奉輕軒去知君無客愁

送集賢學士伊闕史少府敕放歸江東觀省

一作
綦母

潛

陶翰

墨客鍾張侶材高吳越珍千門來謁帝駟馬去榮親吏
邑沿清洛鄉山指白蘋歸期應不遠當及未央春

晚秋長沙蔡五侍御飲筵送殷六叅軍歸澧州觀

省

杜甫

佳士欣相識慈顏望遠遊甘從投轄飲肯作置書郵高
鳥黃雲暮寒蟬碧樹秋湖南冬不雪吾病得淹留

送崔全被放歸都觀省

岑參

夫子不自銜世人知者稀來傾阮氏酒去着老萊衣渭

北草新出關東花欲飛楚王猶自惑宋玉且將歸

送張參明經舉兼向涇州觀省

孟浩然

十五綵衣年承歡慈母前孝廉因歲貢懷橘向秦川四
座推文舉中郎許仲宣泛舟江上別誰不仰神仙

送滕亢擢第歸蘇州拜親

岑參

送爾姑蘇客滄波秋正涼橘懷三箇去桂折一枝將

一作

香湖上山當舍天邊水是鄉江村人事少時作捕魚郎

送王孝廉觀省

李白

彭蠡將天合姑蘇在日邊寧親候海色欲動孝廉船窈

得言
卷二十一
四十八
窈晴江轉參差遠岫連相思無晝夜東泣似長川

送友人下第歸省

殷遙

君此卜行日高堂應夢歸莫將和氏淚滴着老萊衣嶽
雨連河細田禽出來麥飛到家調膳後吟好送斜暉

送崔三往密州覲省

王維

南陌去悠悠東郊不少留同懷扇枕戀獨念一作倚門
愁路遶天山雪家臨海樹秋魯連功未報且莫蹈滄洲

送張直公歸南鄭拜省

岑參

夫子思何速世人皆歎奇萬言不加點七步猶嫌遲對
酒落日後還家飛雪時北堂應久待鄉夢促征期

送杜士瞻楚州覲省

殷遙

風流與才思俱似晉時人淮月歸心促江花入興新雲
深滄海暮柳暗白門春共道官猶小憐君孝養親

送王五昆季省覲

孟浩然

公子戀庭闈勞歌涉海沂水乘舟楫去親望老萊歸斜
日催烏鳥清江照綵衣平生急難意遙仰鶴鴿飛

洛潭送人覲省

儲光義

清洛帶芝田東流入大川舟輕水復急別望杳如仙細
草生春岸明霞散早天送君唯一曲當是白華篇

秦中送人覲省

二月清江外遙遙餞故人南山晴有雪東陌霽無塵騎
別章臺晚舟行洛水春知君梁苑去日見白華新

送友人歸省

王維

萬里春應盡三江鴈亦稀連天漢水廣孤客郢城歸
國稻苗秀楚人菰米一作菜肥懸知倚門望遙識老萊衣

送鄭務拜伯父

綦毋潛

名公作逐臣驅馬拂行塵舊國問郎子勞歌過郢人一
川花送客二月柳宜春奉料竹林興寬懷此別晨

仲夏餞魏四河北覲叔

儲光羲

落日臨御溝送君還北州樹涼征馬去路暝歸人愁吳

嶽夏雲盡渭河秋水流東籬摘芳菊想見竹林遊

送人覲省便成婚

張說

婚禮知無賀承家歎有輝親迎驥子躍吉兆鳳雛飛
溫席開華扇梁門換褰衣遙思桃李日應賦採蘋歸

送楊千牛赴歲赴汝南郡覲省便成婚

得寒字

岑參

問吉轉征鞍安仁道姓潘歸期明主賜別酒故人歡
珠箔障鑪暖狐裘耐臘寒汝南遙倚望早去及春盤

洛州蕭司兵謁兄還赴洛成禮

沈佺期

棠棣日光輝高襟應序歸來成鴻鴈聚去作鳳凰飛
細

草承輕傳驚花慘別衣灞亭春有酒岐路惜芬菲

送陝縣王主簿赴襄陽成親 岑參

六月商山道三星漢水邊求凰應不遠去馬賸須鞭野
店愁中雨江城夢裏蟬襄陽多故事為我訪先賢

送桓子之郢成禮 孟浩然

聞君馳綵騎躑躅指南荆一作荆衡為結潘楊好言過鄢郢
城標梅詩有一作已贈羔鴈禮將行今夜神仙女應來感

夢情

送族弟疑之滁求婚崔氏 李白

與爾情不淺忘筌已得魚玉臺挂寶鏡持此意何如坦

腹東牀下由來志氣踈遙知向前路擲果定盈車

送舍弟觀歸藍田迎新婦二首 杜甫

汝去迎妻子高秋念却迴即今螢已亂好與鴈同來東
望西江永南遊北戶開卜居期靜處會有故人杯

楚塞難為路藍田莫滯留衣裳一作冠判白露鞍馬信清

秋滿峽重江水開帆八月舟此時同一醉應在仲宣樓

送岳州李十從軍桂州 張說

送客之江上其人美且才風波萬里闊故舊十年來劍
拔蛟隨斷弓張鳥自摧楊橋書落落驛馬定先迴

送魏大從軍 陳子昂

行言 卷二十一 五十一
匈奴猶未滅魏絳復從戎悵別三河道言追六郡雄鴈
山橫代北狐塞接雲中勿使燕然上惟留漢將功一作獨有
漢臣功

送告八從軍

孟浩然

男兒一片氣何必五車書好勇方過我多才便起予運
籌將入幕養拙就閒居正待功名遂從君繼兩踈

送人從軍

杜甫

弱水應無地陽關已盡天今君渡沙磧累月斷人煙好
武寧論命封侯不計年馬寒防失道雪沒錦鞍韉

送人之軍

賀知章

常經絕脉塞復見斷腸流送子成今別令人起昔愁隴
雲晴半雨邊草夏先秋萬里長城寄無貽漢國憂

送部四鎮人往單于別知故

徐九臯

天下今無事雲中獨未寧忝驅更戍卒方遠送邊庭馬
飲長城水軍占太白星國恩行可報何必守經營

送鄭侍御謫閩中

高適

謫去君無恨閩中我舊過大都秋鴈少只是夜猿多東
路雲山合南天瘴癘和自當逢雨露行矣慎風波

送張瑤貶五谿尉

他日維楨幹明時懸鎮鄒江山遙去國妻子獨還家離

別無嫌遠沈浮勿強嗟南登有詞賦知爾弔長沙

錢田尚書還兗州

張謂

忠義三朝許威名四海聞更乘歸魯詔猶憶破胡勳別
路逢霜雨行營對雪雲明朝郭門外長揖大將軍

送韋郎司直歸成都

杜甫

竄身來蜀地同病得韋郎天下兵戈滿江邊歲月長別
筵花欲暮春日鬢俱蒼爲問南谿竹抽梢合過牆

送吏部李侍郎東歸

得歸字

蘇頲

陌上有光輝披雲向洛畿賞來榮扈從別至惜分飛泉
溜含風急山煙帶日微茂曹今去矣人物喜東歸

